


历代劍俠全傳

歷代劍俠全傳



上海廣益書局發行

歷代劍俠全傳卷五

溧陽許慕羲編輯

中古時期四

●明代之劍俠下

駕長

王三立以勇力雄於鄉里。開藥肆於海昌。一日有異方僧向市上募錢。以石鉢置櫃上。鉢重約四十斤。每肆要索百錢。至王肆亦如之。王僅與三枚。僧怒。將舉鉢置其櫃。王接而擲之。拋出街心。石爲之碎。觀者譁然。僧惡顏拾破鉢而遁。逾載。王赴吳置藥材。喚吳江小舟。舟子二。一爲駕長。一爲同夥。剗舟之際。似駕長力猛。非櫓脫卽篙折。其夥詈之。恆忍受也。惟張帆時。則駕長右手執索。左手執舵。以足代篙。四體並用。無不恰當。其夥得臥而觀之。故相安也。越三日。晚泊姑蘇城外之寒山。

寺。王觀月明如晝。登岸閒玩。有僧立寺門外。審視王呼曰。客非海昌藥肆之王居士乎。王曰。唯。何以相識。僧曰。予前年托鉢貴鄉。領教已深。今幸相會。實有天緣。予師慕容久矣。請舉玉趾方丈一叙。王曰。諾。姑俟我返舟飯畢。而後會尊師也。僧喜。反奔入內。王歸舟。潸然淚下。駕長見之曰。客何爲悲。王語以故。曰。入其玄中。必無生理。駕長曰。既能擲鉢。何懼乎禿。我技癢已久。今請助客。王曰。我犯僧。死由自取。子何爲哉。駕長曰。吾樂此。死無怨。恐僧不我較耳。請假衣冠以師弟稱。若角技時。必呼吾先。可以無事。王諾之。遂飽餐。偕往入門。羣僧笑迎曰。客信人也。入報首座。出迎中庭。視其人身高七尺餘。臉橫腰闊。氣概粗豪。已望而生畏。肅客入方丈而坐。乃曰。前者小徒蒙賜教。老僧夙夜在心。冀圖一會。今旣垂顧。請至藝圃。仰瞻絕技。王唯唯。於是羣擁入後圃。有地一區。高垣圍繞。僅通一門。亦甚堅實。圃南包大殿之後簷。爲閱武廳事。勢甚雄偉。柱有兩爵。礎三尺。隔以石欄。有椅二。首座與王對坐。寮僧十餘。皆短褐持杖。站立矣。羣呼曰。來來來。王謂首座曰。請徒與徒對。

師與師對。我命弟子先戲可乎。首座曰。駕長體貌清癯。漫應曰。何爲不成。請與賢弟子言。慮有傷觸。毋自慚。駕長亦脫服曰。禿有賊形。恐竊吾衣。必謹藏。乃蹲身抱大殿之後柱。起尺餘。大殿震動。輒瓦齊鳴。以左足掃礎。倒置衣其下。以右足扶直之。仍安柱。轉身呼鬪。聲若巨雷。於是上座及寮僧咸股慄膜拜曰。我教中韋陀天尊。旋乾轉坤之力。不過如是。僧輩肉體凡胎。何敢相角。若尊客一揮肱。則俱成糜粉。情甘降服。不敢再言技勇矣。王與駕長大笑。羣僧屏氣肅候。延至方丈。侍茶畢。王告退。首座與寮僧盡易法衣。執旛幢以送。王返舟謂駕長曰。壯士之力。天下無敵。盍不入營爲伍。則顯職易至。請以資助。聊報大德。駕長曰。嘻。我卽不顯職。亦可以康。何至操賤業。客尙皮相天下士耶。王叩其舊職。及里居姓氏。駕長不答。王報以百金。亦不受。後至吳江。訪諸同舟某夥。則駕長已遠去。據云。因爲友報仇。借此自隱。蓋劍俠者流也。

步家弟兄

廬州李某由寧波附海艘赴滬。共載者五十餘人。內一客年甚少。美秀而文。與李聯牀。彼此接談。意氣頗洽。李叩其姓名。但漫應之。中途客附李耳。低語曰。君知舟子何如人也。李曰。不知。客曰。君不慣涉江湖。不知道途之險。我日來細察舟子。殊非良善。其舵工篙師等人。面亦多露殺氣。若曹居心甚叵測。惟我能辨之。計一路惟某洲最險。倘經其處。不停泊。當無患。君須識之。李驚問曰。倘在此停泊。奈何。客笑曰。君毋多言。幸有我在。彼何能爲。李疑信參半。姑默識以覘之。既至某洲。日甫晡。舟子果命其黨下碇繫纜。諸客僉謂天早。尙可趕程。何遽停泊。舟子不答。諸客大譁。少年以目止之。洲孤懸海中。四望無際。更無別舟停泊。少選飯熟。舟人但自飽啖。並不食客。衆飢索食。亦竟置若罔聞。無何夕陽西沉。諸客飢焰中燒。頗不能耐。舟子忽率其黨。各執刀械進前。厲聲謂諸客曰。此地險要。向爲羣盜出沒之區。汝等所挾資。可速獻出。我當爲善藏之。不則恐有不虞。悔無及也。客多巨賈。挾貲頗重。聞言互相驚愕。知其來意不善。迺哀告曰。我等既同一舟。患難自當與共。各

挾薄貨。固在舟中。縱有不虞。亦全仗主人防衛。如可免患。不惜重酬。又何必劇出勞爲善藏也。舟子聞言。怒曰。爾輩死在目前。猶嘵嘵饒舌。想作看財虜耶。言畢。回顧其黨曰。此時不速了結。復有何待。其黨聞之。爭持刀械而入。諸客相視。覘計無所之。李依少年傍。亦竊自危。第見少年從容起立。喝謂舟子曰。汝休孟浪。汝抑知步家弟兄乎。舟子卒然歛容答曰。唯唯。小人不。敢。少年叱曰。汝率黨入內。意將何爲。迺以肱一揮。卽墮其最獷悍者五人於海。舟子等大恐。急棄刀械。環跪乞命。少年口中不知作何語。舟子等益恐。崩角叩舷。聲如撒菽。自稱無知冒犯罪。該萬死。願出貲另爲買舟。載衆至滬。以求贖罪。少年叱曰。汝既知罪。姑暫寬貸。仍乘汝舟。亦不必另買。如再萌惡念。決不輕恕。舟子等稽顙。唯唯而退。急命具酒食。以款諸客。一路小心將事。伺應惟謹。至滬後。同人僉德少年。謀有以報。少年悉笑而却之。李私叩寓所。容圖踵謝。少年笑曰。吾居無定所。汝盍告我所寓。暇當相訪耳。李具告之。後三日。少年果來作別。問將何往。亦不答。究不測其爲何人也。

鴻奴

和州朱生名宛霞，少孤貧，天資穎敏，讀書五行俱下。年十三，入邑庠，隨以歲試食餼。邑中名宿咸歎爲不及。顧生雖才藻豐腴，而文品極峻，自是屢困場屋。又喪偶，益復無聊。先是生有母姨嫁新城馬氏，家頗饒。生時往探視，母愛其丰神俊爽，每至輒留經旬不遣。姪女曰慧娘，年踰笄矣，未嫁而寡，嫻詞翰，兼善琴奕，而風姿豔絕，性貞靜。惟生至，輒款語不避。庚申秋，生下第，復至新城，女迎問慰解，且曰：「以君才華，豈長貧賤者，然以此時風氣，若稍能降格，何愁榜上一名哉？」生曰：「今簾內固多師曠和嶠一流，但若必以此詭遇，我將披髮入山，不願求知音於前路也。」因泣下。女亦慘然，遂近前以巾爲之拭淚。適母出，詢其故，不勝歎息。母素嗜弈，乃呼婢取楸枰與生對弈。遺悶，女側坐觀之。俄黑子一擲，危甚。女目視生曰：「西南風急矣。」此角君甘棄卻耶？生曰：「何爲？」女約略指示曰：「此處所謂倒脫靴勢也。」母微笑曰：「兒何言之呢也，豈非女身外向，語未畢，女顏發頰，遽起避去，生亦心動，推卻棋枰起。」

揖曰：得如母言，其他更何足惜？母自悔失言，既念姊氏已衰，况玉女金童，良緣難得，越宿述其意於女。父逢樂，逢樂貧之，母言其才可託。逢樂曰：其如數奇，何必若所議？且待來歲文戰後可也。遂罷去。生聞負氣欲歸，母留課其二子。生戀女未忍遽舍，遂強諾焉。無何，母臥病，生入視，適女來視湯藥，遇之東廂。生顧無人，小語曰：妹知我所以留此故乎？女歎曰：深情久篆於中，妾以憐才之一念，遂如春蠶吐絲自縛，乍聞父言，幾不欲生。此後若能藉文章爲薄命人吐氣，則已。否則當於泉下相覓也。生曰：我若終不得卿，今生亦不願更娶矣。但恐人事難知，請定密約以當息壤可乎？女變色曰：若是是負吾父，兼負嬌矣。君焉用此不廉婦也？卽於腕上脫一金釧與之，曰：此物所以示信也。海枯石爛，用矢勿諉。生懷之而出，自是不復言歸矣。後母病尋愈，每晨起必嗽蓮子女私以一盞令婢餉生，適爲逢樂所遭，詰之，婢不能隱，遂以實對。逢樂怒，將還詰女，會里中富商王某爲子請婚，其子不慧，逢樂以怒女竟許焉。後數日行聘有期，女始聞之，遂病，眠食皆廢，漸至綿惓，不得已。

姑爲召醫。醫至診之曰：病以鬱怒傷肝，致心液爲火燦盡，必得人心血合許以合歡皮煎湯飲之，庶可奏効。不然，恐非藥石所能爲也。逢樂以商諸王，王笑曰：癡哉。是欲以爾泉下物而剗吾兒現在心也。逢樂慙恨而返，詣生述醫言。且許締姻。生微笑曰：翁不愁異時煑字療飢耶？逢樂再欲有言，生執卷而起，出至母所語其事。且泣曰：慧娘若有萬分一甥，何忍獨生。適翁來言，要使人不能無耿耿耳。語畢解懷，取佩刀欲刺。母急起持之曰：癡兒奈何先自戕乎？兒姑住此，俟老身往視慧娘再來。生請從。既至，揭其帳，見女慙慙垂絕。母問：今早亦少進食乎？隨告以生在兼述所由。女張目見生脈脈，但有垂淚。既而歎曰：妾負郎矣。疇昔之夜，夢郎來共戲。郎捉妾雙趺，脫睡鞋，納袖中。妾急探郎袖，求之不得。郎嗤笑曰：繡鞋早爲阿鴻將去矣。妾訝曰：此物豈可入他人手？今將奈何？郎不答，起去。妾疾呼，終不復顧。醒而思之，知此事必不可諧。妾向所以不忍遽捐廉者，正爲今日。今魂魄已遊墟墓，郎若爲此，勢必喪爾生。妾亦豈能復活？但未知尙有來生否。遂伏枕慟哭。母撫之。

曰。兒姑自愛。昨而翁已許吾甥。此事尚可圖也。於是攜生至逢樂所。爲申宿諾。且曰。兒病至此。叔尙忍立而觀其死乎。逢樂欣然從之。其母乃返以告女。女意少解。自是著意強飯。未半月已起。王氏聞之。復遣冰來將謀納聘。逢樂許之。母乍聞。甚卽往責其負約。逢樂以王氏約在先爲辭。母拂袖出。適女來。微聞餘言。知事已中變。盈盈欲涕。母慰諭百端。卒不可解。遂復病。未幾竟卒。生入臨。已將殮矣。纔止尸旁。尸忽躍起。衆大駭。女爲縷述冥間事。言始死神飄忽。回憶家鄉。都如隔世。惟思郎不能去心。私念訴諸冥王。或可邀其垂憫。於是信步而前。至一處。見殿宇巍煥。鬼卒森列。可怖。躑躅間。恍惚有一老父。從門內呼之曰。兒何得來此。汝之齒尙未。且汝與吾兒夙緣未了。可隨我去。乞冥王判此公案。遂入見。冥王冕旒坐殿上。氣象嚴肅。老父跪稟久之。王顧令喚妾至案前。諭曰。汝父俗人也。汝二人早爲紅絲繫定。今雖爲情死。猶不失爲貞與義。當仍歸圓破鏡耳。卽喚鬼卒押令還陽。不意頃刻竟能到家也。乃皆轉悲爲喜。惟生細詢老父狀。方相與笑啼交作。忽聞

金鼓之聲。遙震瓦屋。俄一僕奔入曰。謝遷作亂。土寇引賊兵入城。大掠將至矣。母與慧娘方倉皇間。亂兵已擁入。生竄去。母家劫掠一空。賊見女美。擄之去。及新城收復。生返。始知女已被擄。噉然而哭。逢樂與母亦哭。生有僕曰鴻奴。勇健能披甲躍十牛。是時在旁勸生曰。奴願往偵。慧姑其無恙也。奴力能返璧。但問太夫人何以報我。母未及答。逢樂破涕曰。奴乃能爲古押衙耶。他日女歸。當以予爾主。鴻再拜曰。謹聞命矣。遂起携劍出門。時餘賊屯於淄川。鴻徑往其營乞降。居數日。有脇從者爲言。慧娘被擄時。謝遷將納之。不從。脇以刃。慧娘請俟三月後。畢母喪而後。惟命不然。請就死。賊愛其美。故至今猶局置樓中。鴻竊喜。夜半後。躡至樓畔。仰望燈火熒然。躍而上。窺窗隙。見慧娘獨坐。鐙前垂淚。破窗入。二侍女驚起。鴻手劍斬之。挾慧娘飛出。守者始覺。追之不及。天甫明。至新城入門。慧娘見家人環集。如夢乍醒。備言見逼之狀。悲喜交至。既而母願逢樂。今可爲甥議婚乎。逢樂笑謂生。請還白其母。母笑曰。癡兒。此事尙容姑待乎。生悟乃止。合卺甫畢。賊已平。道通。生

攜女偕歸。登堂拜母。母詢知前事。不覺感泣曰。前緣已定。非人力所能障礙也。

扁拐成環

明季有某公子者。夙奔走某相國門。一日從京師持三千金歸。道遇一僧。狀猙獰。所肩行李鐵扁拐。光黑甚重。伺公子信宿。公子初弗介意也。會抵一旅舍。公子先驅入。止左廂。僧繼至。就右廂炕上臥。旅舍主人密呼公子告曰。客必從京師來。囊中必有金。否則若奚俱至。公子始心動。倉皇失措。主人勸公子勿戀金。飲酒坐甫定。忽一虬髯人身丈八尺餘。腰大十圍。鬚盡赤。激張如蝟。卽座上擲弓刀。呼酒食甚急。咤叱作雷聲。公子益驚慌。股慄欲仆。髯微顧曰。君神色俱殊。度有急。盍言之。公子屏息若瘖。主人代爲述持金遇僧狀。髯曰。僧今安在。則指右廂臥炕上者。顧公子曰。無動。直提刀排闥入。罵曰。鈍賊拾糞道上而行。劫耶。因弄其鐵扁拐。屈之成環。擲炕上曰。若直此。聽若取客金。不直。則亟引項就刀。僧僵臥不動。良久始匍匐下地請死。顧視扁拐成環。泣下。請益哀。髯笑曰。吾料若不能直此。聊爲若直之。

去無污乃公刀。公子主人皆咋舌。從門外觀。已復趨前羅拜。請姓名。髯笑不答。令俱就寐。且曰。請護公子行。公子大喜。至揚州。謂公子曰。君今但去無患。吾行矣。公子叩頭謝曰。某受客大恩。無以報。願進三百金爲壽。且從此抵某家。計四日耳。盍俱渡江而南。髯笑曰。吾起家行陣。今隻身來。爲幕府標官。果貪金。豈止三百哉。吾憑限已迫。不能從。或緣公事過江。則訪君。幸爲吾具麵十五斤。生彘二口。酒一石。公子不得已。與別。居數月而髯果至。呼公子曰。饑甚。公子亟進麵。生彘酒如前約。髯立飲酒至盡。除所佩刀刺殺生彘。而手自揉麵作餅。且炙且啖。盡其半。公子曰。參軍力可拔山。度舉幾百鈞。髯曰。吾亦不自料。舉幾百鈞。雖然。請試之。乃站庭檻上。而令數十人撞之。屹立不少動。曰。未盡也。復緊豎中指開一寸。以繩繞一匝。數健兒迸力牽向西。倔強如鐵。不能動半分。於是公子進曰。今天下盜賊蠡起。朝廷亟用兵。以參軍威武。殺賊中原。如拉朽耳。今首舉某。吾師也。吾馳一紙書。且夕且得大將軍印。烏用隸人磨下耶。髯仰天大笑。徐謂公子曰。君願某相國門下士耶。

吾行矣

我來也

昔京師一俠賊奇絕莫測。每入人家竊財貨。雖高墉堅壁弗能防也。臨去必粉書我來也三字於門壁間。被盜之家歲以百計。大率皆貪官污吏及不義之紳商。官吏羅而捕之。久不獲。一日近縣獲一盜。云是我來也。解以來京。繫之郡獄。怨家共詣守言之。皆欲得而甘心焉。盜聞之。謂獄卒曰。我固嘗作賊。然實非我來也。今既認服。有死而已。子幸善視我。當卽有以相報。卒遂善待之。數日。盜謂曰。我有白金三百。在某塔下。盍往取之。卒以爲誑。盜曰。子夜半繞塔三匝。當有應者。金可得也。如言果得之。卒喜甚。待之益厚。盜又曰。某橋下水中有金器數事。亦以贈子。卒曰。橋下行者甚衆。何術取之。盜曰。不難。以竹籃盛衣往澣。沉之水底。下而取衣。因以金置籃中。誰能見耶。果又得之。是夜盜謂卒曰。有所求於子。而無損於子。其許我乎。卒問云何。盜曰。求爲我暫脫枷鈕。出獄勾當一事。五更卽至。決不予累。卒頗難。

之盜作色曰。子受我千金之贈。我出卽不返。子以此受薄譴。亦無負也。況不至此耶。若必不獲命。誠不難破械而逃。於子反恐不利耳。卒不得已。縱去之。心甚惶惑。比五更。盜條從櫓際投下。復就繫。卒大喜過望。次日有富民詣府投狀云。夜來大亡其財。門上大書我來也。守詫曰。我來也。果未獲耶。獄中盜之認明矣。遂薄責而釋之。卒歸家。妻迎謂曰。夜來一事頗奇。有誰何呼門甚急。我啟門問之。其人突入。擲一布袋於地而去。其中纍纍者。不知何物。我不敢發也。卒亟啟視之。則皆黃白物。乃悟盜卽我來也。爲此以求免。且以報己也。秘不告人。

淮上壯士

太原朱生。故家子也。擅文名。累試不第。年二十餘。衫猶未青也。生憤甚。寄情詩酒。放浪湖山。遇學究則白眼視之。因此窮窶日甚。至不能舉炊。王某者。以狀元開府浙省。生父執也。生頗不欲干要人。雖困未嘗一通訊。會太原某宰浙。王詢朱近况。具書招之。朱不欲往。母促之行。既至。王日詢其帖括之學。殷殷以取科名爲訓。朱

頗不耐。第不便當面抵觸。唯唯而已。生嘗作詩以寄憤。中有句云。孔老無科名。道德邁千古。子房無文章。勳業佐高祖。吁嗟豎孺輩。眼光以寸數。博得狀元郎。南面作開府。酸氣猶未除。滿腹秀才腐。爲王所見。王知其諷。已以其狂置之。朱不自安。見王告歸。王亦不留。贈三百金。朱不受。王曰。我與汝父有兄弟情。此三百金係我之奉嫂者。非爲汝母作甘旨也。朱不得已受之。束裝就道。心頗鬱鬱。日以飲酒消遣。行至淮北。有二人尾之。貌頗猙獰。朱毫不介意。傍晚寓一店。朱入東廂。二人亦寓是店。入西廂。夕陽西下。素月東升。由窗射入。清潔可玩。晚風習習。吹茅茨作窸窣響。朱解裝獨酌。縱飲高歌。目空一切。少焉一壯士入。亦旅人之求宿者。至則坐客已滿。壯士解裝沽酒而無坐地。朱以手招之曰。同飲可乎。壯士卽坐下。談論頗相得。夜半飲罷。朱入東廂。少焉有聲甚厲。朱於窗隙窺之。見宿西廂者二人。執刀直撲東廂。壯士以手揮之。二人皆仆。朱屏息不敢作聲。有頃壯士入。朱房。朱曰。黃白物在某處。爾速携去。毋相害也。壯士曰。誰欲爾黃白物耶。欲爾黃白者已被我

仆倒矣。我見爾襟懷洒落，故來護爾。孰知爾亦俗物也。朱躍起謝，壯士已不知何往矣。朱極懊悔，嘗語人曰：只以畏死一念，於風塵中失此豪傑也。

盜嫗

顧少驥，洪武時人也。生具神力，少時得名師授易筋經術，運氣鼓腹，其堅如鐵，伸屈兩臂，數十人盡披靡。性豪俠，急人之急，利害無所計。一日，因事入山，遇西客十餘人，憩於樹下，情形狼狽。顧前詢其故，客曰：我輩皆販賣行商，昨日路經山後，不意爲盜所劫，行李蕩然。此去數千里，關河修阻，何以爲歸。語竟，各仰天太息，涕淚被面。顧問盜幾何人，客曰：一婦人耳。問所失幾何，曰：幾三萬金。顧駭曰：觀子等軀幹容貌，似非無力者，何一婦人遂不之敵？客曰：我等少習拳棒，卽行李中亦攜有武器，奈彼雖一婦人，空手而來，聲言與我等借貸，可盡留下，否則命且不免。我等齊出短械以禦之，彼卽道旁拔棗樹，縱橫揮霍，我等所執器械，皆失所在。而彼卽倒篋出金，挾之去矣。顧問其狀若何，客曰：短小猥瑣，髮已頽白，跡觀其居址。

乃迤邐前行。峯迴路轉。遙見山麓林深處。隱有茅屋。客指之曰。我見其騰躍如飛。自此而下。卽已不見。顧曰。容或在此。試往探之。遂偕諸客直造茅屋。比至。則有垂髻婢立柴扉外。見顧至前。詢曰。先生非顧姓乎。吾主人請先生入見。顧訝其先知。料是異人。因斂抑意氣而進。見堂上坐一老媪。白髮被類。神致堅定。諸客謂顧曰。此真昨日刼金者也。顧前。媪亦不起。但語顧曰。先生與西客偕來乎。請盡登堂列坐。西客皆殼棘就座。俄婢子已獻茶至。至顧處。獨以巨觥。顧受之。若力不能勝者。頃之。媪曰。西客三萬金。現在左廂。先生可自攜去。卽命婢子授顧。顧奮然負之前趨。甫舉足出門。則一大鐵椎自上飛下。有如泰山壓頂。顧塌生平伎倆。出腰間雙棍承之。頸赤足躡。幾爲所壓。片時許。椎自飛去。但聞堂上笑曰。顧先生亦好大氣力。今可安然歸矣。顧竦息不敢出聲。負金偕西客而回。自此不復敢以勇力誇於人矣。

女道士

長安道上。一日有女道士。踽踽獨行。手挾一囊。囊甚滯重。道士年僅二十許。秀曼寡儻。閭里諸惡少。見道士孤行可欺。且覲其囊中物。乃相與笑謔。徵逐之。道士行至曠野。諸惡少亦隨至曠野。道士忽思少憩。則以一手推道傍石柱。石應手倒。復以一手撥整之。乃置囊於石。安坐石上。回顧諸惡少。則已杳然無踪矣。蓋石之高。倍於人。計其重。當有數百斤。道士以手推之。挽之。視若無事。以是諸惡少皆咋舌。不得縮。紛紛鼠竄去。或曰。女道士蓋劍俠者類。從師學道。今始下山也。

霍韻娘

黎文祥。太原人。始微時。家貧好讀書。父師俱以大器目之。比習爲帖括。久之。竟不能成文。苦加督責。則憤然曰。君子立言立德。夫何需此。驢鳴犬吠之文。以記姓名哉。師奇其言。又以其質異。不忍遽令輟業。委曲論而已。至翌日。黎忽亡去。不知所之。十年始歸。體貌瑰偉。丰神朗澈。與人談多玄妙之理。間及劍術技擊之學。聞

者茫然莫對。父母詰其向在何地。祕不肯言。然自此遂以拳棒家自名。師之者戶外屢常滿。一日有少林僧。造極道企慕之誠。言次問黎婚未。黎曰。遠出甫歸。未暇及此也。僧言適自秦中來。西安有一奇女子。霍韻娘者。國色也。精嫻各技。秦中無與敵者。特標其門曰。有角藝而勝者。願奉箕帚。小僧頗欲得之。恐不能勝。願與君偕行。不勝則君繼之。未知姻緣簿爲誰如意珠也。黎笑諾之。遂策蹇俱去。既抵西安。往詣霍舍。則崇閎廣廈。宛然世家。及見韻娘。高髻淡粧。姿容絕代。一婢捧劍而侍。請黎更衣。黎揖僧先。僧窄袖蒙首。躡履而前。女見僧至。雙頰微酡。頗有慍色。翩然入內。久之始出。謂僧曰。來僧奮拳。蹂進。女稍偏以避之。僧左女右。僧右女左。騰挪數四。女驀起一足中僧股。僧踣去尺許。呻吟地上不能行。黎趨視之。血液淋漓。骨中折矣。女笑曰。禿奴破戒。宜受此苦。因請黎角。黎遽飛劍及之。女笑不言。從容向侍婢取劍相迎。縱橫揮霍。頃之。但見寒光萬道。莫辨女影。黎方欲盡技敵之。女忽收劍曰。君勝我矣。女父出歛霍。留宿齋中。以踐姻約。而送僧於逆旅。黎合盞

後。伉儷甚篤。間時縱談及僧。黎曰。此衲子拳法甚高。已臻少林絕技。何以遇卿。乃創之甚也。女曰。妾師所教。惟有一法。可以破彼。曩妾入內易履。苟一着足。無不立殞。因視履內。瑩然三寸許匕首也。後黎從軍蜀中。積功至太守。分治重慶。攜眷赴任。一日。偶與韻娘遊錦鷄坊。登亭眺覽。忽見少林僧同一老和尚至。老僧碧眼方瞳。眉長寸許。爪若麻姑。謂韻娘曰。婢子無知。擅傷吾弟。今日汝命恐不得逃。瞥吐雙丸。直射韻娘。韻娘凜然寒噤。但覺周身冷若冰雪。須臾。老僧曳杖竟去。黎與韻娘若喪魂魄。忽忽乘輿歸衙。迨夜卸粧。則鬢髮盡落。若刀薙然。及解羅襦。則紅抹胸劃然中斷。方知老僧固劍俠高手也。夫妻因向空頂禮。始得無恙。後黎細訪顛末。知老僧本與其師同門。

吳四娘

明季有李生者。以其父官山西。隨侍任所。一日。公偕僚友數人晉省。薄暮抵一市鎮。奔波竟日。已僕痛馬瘡。既投旅舍。即命侍者沽酒圍飲。方歡笑縱談。傾杯痛

飲間忽數麗人牽帷擁入笑請歌侑蓋西北流娼類多如是生時年少被酒豪情頓發因命列坐以佐清興之綠衣女郎年可十八九侍坐生傍明眸皓齒豔絕人寰生故長身碩立風貌偉偉者席間兩情款洽色授魂與同行諸友乃戲謂生曰李君得麗姝真不愧一對玉人無虛此行矣女郎亦依依肘下深情無限無何鐙闌酒酣諸姬星散而綠衣女郎隨留與生共寢枕焉羅衣競解歡愛臻至既而女郎卽枕上自述身世云吳其姓四娘其名本宦家女以事淪落久願擇人而事生本蘊藉少年昵女言與女指天誓月爲嚙臂盟翌晨生起諸友已早啟行但留言囑生晚間會于省垣某旅舍云侍者傳去客語生卽欲追蹤諸友四娘戀戀不捨強欲挽留生曰余儕奉公而來甯能貪歡悞事况此去省城尙百里之遙不及今首途則異時中道日暮將隻身行荒榛中矣乃命旅店小子代爲秣馬晨餐畢卽與四娘握別四娘尙欲強爲挽留生絕裾而出比至郊外日已傍午行程未幾忽一少婦自叢林中出自言所居不遠要生共往小憩生素耳其地多女盜往往

以毒藥製餌饗客。客食後昏迷，則括囊以去。以故竭力推辭。窺婦稍懈，卽策馬迅馳。度其荏弱，必不能追及也。不意行無幾時，婦忽躍身馬前，以一手挽生馬。馬矗立如木雞。婦卽腰間出匕首，光瑩如雪，怒目向生曰：人謂汝誠，以余觀之，汝實狡獪狂且，生戰慄無人色。傾囊以獻，哀求乞命。婦笑曰：是淺淺者，乃足贖汝命耶。實告汝，苟能從吾行者，並此可勿需。不然，雖欲乞命不可得也。生不得已從之。行數里，漸入山徑，抵山麓，有精舍數間。婦以指扣扉，俄一婢子出應。婦乃自入，令生待于堂隅。方徘徊恍惚間，忽一麗人自內出，笑挽生曰：妾愛君深，不意竟不能爲妾少留。今幸屈玉趾，當可再拾墮歡。生視之，麗人非他，蓋卽吳四娘也。因詢女奚至此。婦人何人，四娘曰：茲爲妾家，邀君者卽妾姐三娘。曩君別後，妾卽甯家，轉思此去省城尚遙，君隻身何可獨行，故乞阿姐相邀。今請耐居於此，明日當送君歸。生時中心忐忑，旣慮諸友懸望，且懼悞事致嚴父，乃緬述已事。長跪哀女曰：旣蒙見愛，相聚會當有日，何必爭此一宵。且以愛餼生故，至累餼生，當亦非卿所樂。四

娘意動。乃與生堅訂後約。命婢往邀婦至。乞婦護生至省。婦怨曰。余豈爲若供奔走耶。何來之去之。任若所。四娘笑謝之。生又從旁哀求。婦乃勉允曰。時日已晚。去則速去。余事忙。不能隨汝等意也。以是生遂偕婦行。時值三五行程未半。已明月滿地。婦飄忽馬前。步趨甚駛。每遇叢林深密之區。輒出小角吹之。其聲嗚嗚。林中亦報以笳聲而過。久之。隱見雉堞。婦曰。相詎不遠矣。生訝其神速。婦曰。余儕所行。較驛程近十之四五。特行旅不能出是途耳。無何抵城下。婦致聲道別。倏忽已逝。生至旅舍。則諸友盼望正殷。夜已逾二鼓矣。乃備述所遇。共相太息。後生從別道歸。甫逾一月。其尊翁遽沒於任。扶藪南返。遂不知四娘音耗。

比劍

桐城方錫侯。富而任俠。尤精劍術。一日有道士造門請見。方知爲異人。卽拜之爲師。道士盡其所長授之。惟不及劍。謂之曰。吾生平絕技。悉授於人。無所隱也。願能精吾技者。天下惟三人。君卽其一也。吾觀子神骨清澈。頗有道氣。法當尸解。雖工

劍術亦未足爲多。乃更授以吐納導引之術。曰：此內丹也。煉此雖金石水火多無所畏矣。後道士別去。方技益進。雲遊四方。遂無遇敵者。偶至漢上。一日有老嫗青裙白髮。貌甚清古。攜一少女。造門請比劍術。方延之入。視其女。年僅十四五歲。髮尙垂髻。容豔若桃李。而神清如冰雪。異焉。詢其姓名。不告。曰：第比劍術耳。奚瑣屑問爲。相約於黃鶴樓前。訂期而去。及期而往。女已先在。捧劍而立。繡裳寬袖。非劍粧也。方請更衣。曰：不必。語次。白光一閃。劍已及頂。方急出劍敵之。一劍又起。飛舞空際。白光旋繞不定。但聞颯沓之聲。驟若風雨。女身隱躍光中。不能正視。鋒甚駭疾。不離方之左右。上方逾退。劍逾迫。時觀者千人。咸木立神悚。無敢出一語者。方大懼。奮身一躍。出八九步外。曰：神技也。止。止。無過逼。女乃收劍。視方微笑曰：君能敵我。亦大不易。無怪師云爲門牆高足弟子也。方異其言。詳詰來蹤。則授女術者。卽方之師道士也。道士常道方能。故女來一校耳。方因問女。劍術之外。尙有何能。女不答。竟去。方後入山。不知所終。

落雁姑娘

紀大姑，浙之南潯人。父宜，力敵百人。乾隆中武進士也。大姑七齡喪母，無兄弟。宜白愛之如掌珠，令學男裝，稍長，貌姣好，亦孔武有力。宜白乃授以拳術，以及各種武器，無不嫻熟。彈或矢，所注無不中。距家半里許，有一塔，嘗有雙雁集其巔。大姑戲取機弩，二矢並發，皆應弦落。里人以是稱爲落雁姑娘。名噪數百里。一夕，宜白外出，大姑偕女傭獨居樓中。夜將半，聞隔垣有墮瓦聲，大疑，披衣起，從窗隙窺之。見有黑衣賊七八人，攀隣屋而上。蓋隣爲潯之著名富室某也。大姑急啓半扉，連發數彈，賊噉然而倒者五六輩。時富室亦聞聲驚起，餘賊皆就獲。事定，賊嘆曰：「早知爲落雁姑娘之隣，決不敢冒昧至此。」年逾標梅，猶未受聘，嗣以乃父年老，喜浪游江湖，與人角藝，恐遭不測，請于父，以男裝隨行。宜白許之。歷浙東西，入閩，由閩而贛，而豫，入山東界。至某鎮，有數勇士鬪場決鬪，觀者千人。紀氏父女，投所好，急擠入場。見一少年敵二大漢，此少年英姿颯爽，氣概不凡。雖在鏖戰中，有好整。

以暇之致。大姑心慕之。正凝視間。忽聞其父語曰。汝見西北隅高墩上乎。有人施放暗箭。恐不爲少年福也。言未已。嶄然一聲。箭已至。大姑一躍如閃電。拔劍撥之。箭皆返墜數丈外。觀者大譁。咸謂決鬪者以兩當一。已弱矣。况施暗箭乎。二大漢慙而退。少年感大姑相救。長揖致謝。大姑覩覘無語。宜曰。乃前詢少年家世。知係皖籍。亦將門子。尙未有室。大喜。急邀歸逆旅。說明大姑係釵而弁者。如不見棄。願結秦晉。少年喜甚。立允之。乃相將南歸。歸後數月。宜曰。病死。又數月。少年至。遂娶大姑去。後有人遇之陝西。謂夫婦皆爲標師云。

駱女報仇

駱氏女者。東平產。父爲御史。以直言忤當道。搆罪流口外。旋以憂憤卒。窮荒女留母都門。自出塞扶柩歸。歸後始悉其家產爲豪奴馬二攘奪盡矣。奴已不知何往。懇諸衙門。擱置不理。流離飄泊。無以爲生。乃負母遠歸。沿途乞丐。啟行兩月。始至齊境。而其母以悲感餘生。備嘗艱苦。竟病死于途。女赤手空拳。無以爲殮具。悲慟

幾絕。有晉人顧開甲者，見而憐之，問女何以至此。女備述巔末，顧乃出資爲營葬。又以女孤苦無依，欲攜同歸。女感激涕零，請以父事。顧諾之。翌日薄暮，距旅店尙遠，不及投宿，驅車前進。忽響馬至，顧戰慄無入色。女從容曰：「父母驚，賊至，兒或能退之。」顧曰：「汝慎矣。」雖雞豈敵鷹鷂哉？言未已，賊騎大至。女下車罵曰：「鼠輩敢爾，不速退，難貸一死。」羣賊怒吼，舉刃向前。女乘其不備，以手削其臀，銳于刀。一賊踣，繼至，亦如之。賊氣餒，然終以女子易之。復賈餘勇，合力前進。女奪仆者刃迎敵，賊盡傷夷，鼠竄去。顧始奇女，益愛重之。嘗謂女曰：「汝有此絕技，大仇可復矣。」女曰：「兒何嘗一日忘前此未報者，徒以老母在，不能離也。」母逝，又重負大德，涓埃未報，何能忽然從事耶？然報復自有日耳。女侍顧夫婦甚孝，過于所出。會顧婦病瘵，百藥罔效。女割臂肉和藥進，得痊。又慧婉，邀人憐，寄籬數載，無議者。翌年婦卒，女哀毀逾常。顧益德之，欲爲論婚。女執不可。越歲，顧亦逝。女哭泣盡哀，葬日，親臨空宮，督視周至。廬于其墓，工竣乃返。顧幼女曰雲姑，與女最親，飲食起居悉與共。一日，女謂

雲姑曰。吾將別矣。所難忘者妹耳。使余此去得復仇。當再來。否則相見無期矣。雲姑知不可挽。惟有涕泣。方依戀間。已失女所在。逾月。女仇家居京。盜夜入室。殺大小十餘口。馬二得駱氏財。納資捐佐雜。詣河南。未幾。全家亦被殺。官緝捕甚嚴。風傳至晉。雲姑知女仇已復。憶臨別之言。朝夕企盼。一夜挑燈獨坐。女忽飄然入。雲姑驚喜過望。遽詢別後情。女戒勿聲。于是滅燭登床。聯衾共話。雲姑聞之。時而驚。時而泣。終乃大快。天將曙。女欲去。雲姑留之。女曰。我爲在逃之罪犯。捕急。不可不歛跡。朝去夜來可也。雲姑無已從之。久之。捕令漸懈。女跡稍露。嘗兩三日留。教雲姑習女紅。兼及文字。雲姑欲學劍。女稍稍導之。輒能領會。嘗請益。女曰。妹何須此。余命薄。故習之。但願天下後世女子。無似吾命。無習吾業可也。雲姑于歸後。女遂不復來。

掌心黑點

德清俞某。以解餉道出京口。將舍館。及門。瞥睹一少年。張兩目直視。口涎流頤。左

臂側重而獨伸右臂。反其掌下嚮。若有所取攜狀。駢其足植立門外如僵。雖五六壯夫喧譁推挽。莫能動。僅有老人諄訶曰。汝曹浮薄子。不解事。強調人家女郎。微叩求此姑姑者。此子不得活矣。俞某怪而就問焉。老人曰。頃間一女郎乘獨輪輶車。翹足車軾上。結束瘦削若錐。諸少年相謂。能一握此粲者。纖鈎當不吝酒食相壽。及女郎車至門。此少年果猝出手握其足。諸人方譁笑。而少已體若寒噤。揚手不得下。女郎了若無覺。盈盈下車去。而少年僵矣。俞某聞之。驚訝不已。而心憐此少年以輕薄取禍。問女郎安在。老人以告。逕趨女郎所。爲少年請罪。且曰。牽牛以蹊人之田。信有罪矣。而奪之牛。罰已重矣。女郎點首出。輕掖少年右臂。少年出氣作嘯聲活矣。後少年視己右掌心有黑點如黍。則所觸女郎履泥痕也。

朱大脚

朱大脚者。婺民朱四客之女。勇健有膽。兼善運氣術。嫁襄陽某武弁。一日歸甯。以一僕自隨。過九江境。山嶺下逢一盜。軀幹甚偉。持長鎗。叱大脚使住而發其篋。大

脚不答。乘間自後引足蹴之。墜于崖下。時已薄暮。大脚遂投宿一媪家。白其事。媪愕然。如有所失。將就枕。所謂盜者。跛曳從外來。發聲長歎曰。我今日晦氣。在途行劫。反爲一女子所辱。正欲細述。所以媪搖手指之曰。止。止。彼女正在此宿。乃具飯餉夫。且將甘心焉。大脚隔室聞之。急運全身氣。僞睡以待。漏三下。盜操刀入。揭被連斫數刀。不入。而刀鋒反鈍。盜大駭。大脚徐徐起曰。鼠子。技止此耳。乃圖殺老娘耶。且語且拔劍出。劍光四射。寒氣逼人。盜懼。偕媪跪地請曰。小人無知。冒犯天神。乞恕一死。大脚哂曰。汝夫婦本不足污余刃。余將上道矣。速爲我主僕具餐。以贖汝罪。盜唯唯。殺雞爲黍。須臾。大脚飽餐而去。

德州尼

丁生仁。和籍。挾貲入都。從二僕。甫入德州界。卽有二騎客尾之。丁大疑。薄暮。不及至市集。見道旁一茅菴。叩其扉。一尼出。拒客勿入。丁固求。且云。但得殿廊一席地。挨過此夜足矣。尼曰。待稟明大師。再取進止。卽還身入。須臾出曰。大師已諾。丁喜。

出朱提一流曰。區區者願納爲香火資。尼勿受。爲除旁舍。並具飯款客。食已。忽傳大師語曰。此間多匪類。來如挾重貲。夜中宜慎重。丁憶及日間兩騎士。頓懷疑懼。卽曰。盜得毋騎乎。尼曰。盜不盜。非關騎不騎也。防之良是。及漏三下。燭滅。兩脚如繩。客不敢寐。忽聞簷際有聲曰。幸未中。又聞一人聲曰。中吾耳矣。險哉。已而寂然。明日侵晨將啟行。尼進曰。夜來大師出殿墀。已發遣二盜矣。惟大師一片慈心。不欲死賊。故一劍但逾其髮際。一中其耳。小創之而已。丁感甚。苦求見大師。入方丈。叢花盛開。湘簾半捲。中坐一三十許麗人。尼曰。此是也。丁大驚異。敬禮之而退。將出門。尼又傳大師語曰。有口號在。當授客。去此十五里。有寺。中有駝背行者。爲大師高足。汝將大師命。並述口號。行者必護汝出山東界。可無盜患矣。丁唯唯受口號而行。未幾。果得行者。竟如尼言。安抵京師。

丫奴

山左何生者。富而好義。嘗客金陵。遍謁同舍郎。一少年客居西室。首戴長巾。衣甚

檻樓而珠神玉貌如好女子。見人輒扃戶避去。何心儀之。投三刺。客矚亡。始來答拜。他日窺其室。曲突無煙。客坐繩牀上。擁敗絮而已。退問主人。客何姓。何許人。亦弗之知也。乃謂稅居半載矣。值勿償。不能復館之。何歎息不已。意必避難而窮於途者。乃代爲納值。囑勿言。問餽以金錢。周恤之。客不辭。亦不謝。無何款其關。則無應入其室。無人焉。客竟去矣。牀下有青布囊。啟之。所餽錢悉在。深歎其廉。然心竊怪之。未幾。何還山左。里人誣訐其陰事。縣官索賄賂。至鉅萬。始得理。家由是破。遂南遊於楚。稱貸其故舊之官湖湘者。薄有所得。旋治任經洞庭之野。忽林間逸出一巨獸。紅毛鋸齒。當途而立。勢將搏噬。莫可逃匿。倏有女子飛騎來。錦衣弓鞋。腰劍挾弓矢。卽馬上舉足勾獸鼻。獸狂吼而奔。女逐之。絕塵而去。何雖幸得脫。而所駕馬驚於獸。鞭之不肯前。不得已。返轡故道。馬乃行。日已遲暮。不及宿。獨止野廟中。不能成寐。夜深月出。起步廟門外。微颺拂面。聞笛聲。悠揚纖妙。且聽且行。俄笛聲止而笑聲起。則燈火爛然。甲第大闢。有攝華衣冠者迎門外。揖何而進之。

抗賓主之禮。何懷疑不測其由。乃徵其氏族。其人曰。君忘金陵西室之人與。卽我也。何審視果是。因問向者。去之密。今何遇之巧。客曰。余窮而遁去。投止於此。感君舊誼。故特相俟。何訝其預知。客唯唯。語次。聞客腕釧觸几。頻有聲。何竊左右顧。而見其冠下微露鬢梢。心愈疑而不敢詰。客笑曰。君疑我耶。日間馬上驅猛獸。爲君除道者。亦我也。因探去其冠。而雲鬢見。何大驚。亟拜稱謝。呼曰。神人。女亦答拜之。曰。吾雄服游戲人間。以貧自晦。遂不爲人識。君獨助我。故我亦助君。適以相酬。奚足復齒。旋顧謂侍者。呼丫奴出。乃十三四歲女子。頭作雙角髻。短襖窄袖。秀若雲霞。女與之語。殊隱躍。丫奴曰。諾。遂拂簷而去。頃之。劍聲呖然。丫奴已瞥下。反命曰。畢矣。女乃命治餐。杯盤立具。極海陸之陳。夜向晨。何不勝酒食。起辭告行。女亦不强留。然眷戀之情。溢於顏面。有長鬚奴控騎候門外。卽何所乘。馬裝資亦在。何遂別至家。家人乃言里人及縣官。一夕死於盜。而並亡其首。問其時日。適何見女之夕也。始悟卽丫奴所爲。愈感之。及理行篋。則益以厚贖。別一小匣。緘甚固。啓之。

得小劍長三寸許。淬利如霜雪。試削庭前樹。未至樹已斷。剖石石解。意所向。擲劍。劍輒往。已復還手中。蓋飛劍也。何喜甚。寶之匣中。閒出而玩之。歲餘。劍首之環脫。其夜室中如虎嘯。有白光拂牖而出。劍乃亡。何惘惘如喪者累日。時沍寒密雪。忽聞門外馬嘶聲。出視。有駿馬止焉。鞍鞵悉具。疑亡而逸者。而鬣間隱繫繡囊。解視。得蓮花一瓣。書曰。騎至卽發。並不署款識。何頗疑怪。而馬數數昂首跑地。若勸駕之狀。試跨之。則東南而馳。絕駛亦不知里數。既至一處。蓮花池相續如帶。及第三池上。馬止而嘶。不復行。乃見高墉表延。立處當朱戶。戶內人語曰。至矣。戶乃闢。有小鬟招之曰。進。何徐徐步入。遽行至內。則曲室銀缸。熒熒發碧。黼帳中有呻而歎者。小鬟前白曰。至矣。則聞鈴聲鏘然。帳徐啟。有麗人擁衾而坐。神韻酸楚。何逡巡審視。女也。女見何。訝然色喜。已而躍然起。問奚以能來。何告以故。女顧侍者曰。此必丫奴也。侍者皆點首微笑。頃之。丫奴自外入。衫翠笠。落花滿身。鴉鬢楚楚。已勝雀翹矣。女彈其頰曰。妹子召客。何得不告我。丫奴笑曰。吾爲姊病甚。趣召之。故

不及關白。女默然低首。已謂何曰。妾相天下士。每不留盼。雲翔電邁。頗亦自豪。不圖爲君纏繻至此。於是與何爲夫婦。何以失劍告。女責之曰。吾贈君飛劍。爲君能用之。乃秘藏爲弄具乎。彼乃神物。豈長處匣中。宜其亡耳。顧此物怪變非常。非得丫奴。莫能收攝也。何固屬意丫奴。乃請與之俱。女初不聽。何固請。女笑曰。察君之意。殆非爲劍也。何不能隱以情告。女曰。吾固欲之。然事不可驟。當說之以值其意。乃謂丫奴曰。郎劍遁。是物不易馴。須妹子一往。使郎佐汝。丫奴曰。妹自足了當。何以佐爲。女曰。雖然。亦使郎一覩其狀。聊試勇怯耳。丫奴許諾。女竊教何曰。君與妹子求劍。見有物。青色如龍者。劍也。毋怖。毋却。然且僞爲怖恐者。而匿就妹子。彼爲君畏故。將不忍拒也。遂同行。至萬谷之間。風聲蕭蕭。丫奴顧何曰。劍在是矣。果有物長五六丈。蜿蜒於層崖之巔。丫奴招以手。物卽投下。入手中。遽已縮小。依然小劍耳。何憶女教。乘其舉手。佯驚呼走。抱丫奴腰。作戰慄狀。丫奴大笑曰。姊亦大憤。如此薄膽郎。何必教來。因以劍授何。何故爲畏縮。不敢受。而抱持益力。丫奴兩

頰漸發頰。若不自持者。何凝睇送意。迫懇之。遂及於亂。及還。女戲曰。妹子嘗爲吾塞修。吾今報稱焉。於是丫奴亦歸。何。丫奴謂何曰。吾姊妹皆紫蘭宮捧劍侍者。與姊竊戲西圃中。拔劍對舞。誤傷守宮之鶴。故謫墮人間。使主游俠之事。遇鏡而圓。幸託於君。及瓜而代。又將去汝。此後落花明月。萬古相思。殆無相見之期矣。何大悲。二女亦泣。女謂丫奴曰。妹子故善笛。今盍爲郎奏之。丫奴擲笛爲悲涼促遏之音。一時風吼霜飛。肝腸盡裂。乃投笛於地曰。離緒填胸。安有佳響。不如且已。遂大慟而別。何獨還鄉里。亦能通白猿之術。每爲人旁雪不平。或有妖憑魅祟。室宅不靖者。何以劍往。立警服。

· 異僧

江左施生。應試歸。泛舟巢湖。遇一僧。鶴髮蒼顏。龍鐘偃僂。來求附載。施以獨行岑寂。又以其皤然老僧。慨然允之。既登舟。僧卽跌坐。狀若極憊。施顧僧。獨有右耳。心大異。欲問而僧方閉目靜坐。施亦不欲擾之。無何夕陽西去。天將昏黃。乃繫纜灘。

呖炊煙一縷。香到黃梁。餐未竟。蘆葦中突出盜十餘人。各持武器。寒光閃爍。僧歛然起。謂盜曰。壯士勿凌孤。老衲身外無他物。此弱書生。布衾一襲。破書數卷而已。一盜笑曰。滑和尚勿預他人事。豈有行路人而無資斧者。遂一躍登施舟。僧以手格盜墮水。餘盜大譁。紛然競上。僧舉篙一揮。踣者七八人。餘始辟易。不敢進。僧舉篙叱曰。老衲五十年前。殺人不貶眼。今持戒已久。姑宥汝輩去。再怙惡。刦孤客。老衲若知。必不宥汝輩也。羣盜抱頭鼠竄。施長揖謝僧。僧笑曰。鼠輩乃敢班門弄斧。先生亦知老衲爲何人乎。潁川道上有所謂金刀無敵將林道堅者。卽老衲是也。施聞言汗流脊背。屏息不能聲。僧言曰。請勿懼。以畢吾言。因指其缺耳。嘆曰。老衲非經此巨創。安肯放下屠刀。先生知吾削髮故乎。吾潁固多盜。然盜亦有道。不刦孤客。不犯淫戒。非萬不得已。不得傷人。老衲甫冠。已爲此輩之魁。爲盜數十年。恪守宗風。所獲亦無算。一日方午。於臨淮道中。見七香油碧車。中坐一美娥。姿容艷絕。疑爲天人。真所謂不曾真個也。魂銷者。因策騎尾之。殘陽入暝。斜岫迷雲。

抵一村落樓閣玲瓏巍然矗立蓋一富室也余自恃技精越高牆如履平地是夕月明如晝翻然飛入偵知彼妹所居爲小樓三楹余攀簷俯窺見樓中燈影搖紅碧窻四扇尙啟其一彼妹已卸妝待睡而室中婢僕尙憧憧往來余伏瓦上良久衆聲漸寂彼妹亦入幃鼾聲作矣余乃推窻入覺芳氣襲人如入醉鄉逕前牽其幃而女已覺叱余曰若欲借貸耶積中多阿堵物可持去余笑曰乃公非利汝資欲親汝芳澤耳語未畢余之左耳已脫然入其纖掌乃長跪乞恕女曰若亦好身手速去無多言余忍痛掩耳帖然出見余騎斷草路旁遂踏鞍行未數武忽恍然悟念彼妹殆菩薩化身導余改行爲善者乃向樓三揖誓入空門以贖前愆由是苦行數十年回首前塵已如隔世今見鼠輩無狀幾犯殺戒然與先生相遇亦是宿緣世路荆棘白雲蒼狗借問長安名利客何如此處學長生先生慧心人決不以老衲之言爲河漢也施再拜受教以金爲贄不受強之跌坐瞑目寂然不應及旦僧忽不見詢之舟子云天曙時僧忽登岸去衆追之僧步履如飛一刹那間已

入蒼茫曉霧中逝矣。施驚惋若失。既歸遂隱於名山。後束髮爲黃冠云。

剛卯符

樂崇道潯陽人。性跳蕩。喜拳勇。所交友多匪人。承祖父餘業。席豐履厚。揮霍殊豪。臨事喜武斷。鄉里爲之側目。居恒每謂人曰。馳馬試劍。固丈夫事。特未見巾幗而負鬚眉氣者。一日。里中有繩妓至。能舞刀奪槊。以兩足承巨甕。運動如飛。輕薄子習少林術者。涎其美。入以遊戲語。欲與之撲。稍近身。跌出丈許外。十數人齊奔之。殊無所懼。頃刻間。或仆或顛。無一免者。崇道適過其旁。歎曰。彼女子抑何勇也。招致其家。使盡獻諸技。既畢。請與之角。繩妓曰。如欲角藝。請先觀郎君之所長。崇道易短衣後。出至中庭。盤旋踴躍。良久乃畢。昂然獨立。頗有自負意。繩妓觀之。笑曰。此如蜻蜓點水。蜉蝣撼樹。直同兒戲。若與兒較。恐傷貴體。崇道勿信。徑趨前。以雙手抱其腰。力舉之。起。繩妓故作旖旎態。曰。勿惡作劇。請釋玉手。崇道曰。汝果有力。量。何難自脫。繩妓嫣然一笑。纖腰略轉。崇道已蹲地不起。繩妓遽來扶掖。曰。非敢

驚貴人。實貴人伎倆太淺耳。崇道再拜。願受教。繩妓朝夕指授。盡傳其技。閱半載後。技成。乃別去。里中人由是益畏之。山東錢選。字青臣。以御史外調。出爲九江太守。固所稱骨鯁吏也。甫下車。訪知崇道橫行鄉曲。案牘山積。忿然曰。此風何可長也。立出火符。遣役往拘。三往。皆以賄免。太守乃夤夜親自往縛。僞爲友朋從遠方往訪者。門啟。盡入。諸役進內窮搜。狀如狼虎。崇道知不能避。挺身出見。詰太守曰。我有何罪。曰。俟控汝者至。自知也。卽繫桎梏。驅之行。甫抵署前。遙見紅燈千百盞。飄馳電掣而至。爲首戎裝而乘馬者。貌殊猙獰。叱役人曰。樂崇道是我仇家。當與我治以酷刑。以快我志。顧問左右曰。崇道何在。答曰。桁楊在身者是也。立令除之。擁之竟去。太守呼捕役追之。相達數百武。倏已不見。太守嗒然若喪。如遇鬼魅。翌日。緝騎四出。音耗杳然。當崇道之被刦以去也。透邇至一院落。峻宇雕牆。飛甍畫棟。有如王者居。堂上皮冠而盛服者。召之升堂。見其人虎頭而燕頤。形狀威猛。初不相識。崇道至此。昏若夢寐。其人曰。我姓邱。字道安。楚南人。少習技擊。以不樂

仕進。隱居衡嶽山中。前逢饑歲。眷屬流落南昌。蒙君慨贈多金。得以生還。今日之舉。所以報也。生感重生。再謝再三。因詢此處地名。謀適他所。爲避禍計。邱曰。且在山中。略住數時。俟禍君者升任去。即可歸矣。延入後堂。設讌款待。酒半。呼妻女出見。妻年五十許。殊有大家風。女則髣髴似曾相識。丰致娉婷。容華煥發。含笑問安。崇道頗形局促。俯首凝思。恍然有悟。因曰。卿非卽當年授術之技師乎。相隔三年。抑何容光頓異耶。邱曰。昔年小女承千金之惠。始整歸裝。得復團聚。君之嘉惠。未敢忘也。故令其一見耳。把酒旣竟。翩然卻入。崇道一住山中。條逾數月。偶遊一園。登涉陵阜。捫葛攀蘿。徑殊幽險。繼登一亭。小憩足力。見一女子。縞袂素裳。丰韻獨絕。近視之。則繩妓也。因詢何爲頓易素妝。答曰。昨得遼陽信音。所天鬪賊陣亡。茲已賦寡鵠矣。言之容貌殊戚。崇道曰。尊夫授何職。曰。總兵也。曰。旣是父家夫家。俱係世族。居顯宦。何以昔年旅居豫章。致屈作繩妓哉。曰。不過聊作遊戲。藉鬻技以餬口。郎君見妾。曾示人以色身哉。我父固武進士。因憚宦途之險。故願歸耕隴。

畝耳。崇道因問女名字年齡。女曰：妾名素英，字小娟，問年已數到星張翼軫間矣。一日崇道率從騎數十人入深山縱獵，馳騁甚樂。忽一獐二鹿突起草間，策馬逐之。發三矢，二鹿俱中箭倒地，一獐獨啣矢而奔。崇道逐之不捨，獐口吐一物竄去，路轉峰迴，倏忽不見。回視所吐物，乃剛卯符一方也。玉色溫潤，的係古物。崇道大喜，如獲拱璧。自此恒佩於身。時近夏令，邱老招飲於涼亭，四圍皆池，偏植芙蕖，翠蓋亭亭，早已探水而出。邱老命人摘荷葉爲碧筒杯，崇道飲之，芬芳撲鼻，觀立行吸盡，酒酣解衣而佩玉現。邱老見之，注目良久，詢所自來。崇道備述其由。邱老曰：奇哉！此吾女嬰年之所弄也。昔年於清明時踏青河畔失之，爲之累月不懌。今復爲君所得，要亦前緣也。翌日邱老謂崇道曰：老夫有一言相告，吾女技藝超出尋常，容貌亦頗不俗，其性情和婉，秉質淑柔，君所素知。今已作寡鳳孤鸞，亦復可憫。然尙在盛年，要非久計，意將擇人而嫁，度無如者，不揣冒昧，願結絲蘿，惟君意何如。崇道起再拜而言曰：固所願也。第家中尙有糟糠，能俱爲嫡室，則敢從命。邱

老曰。是無不可。誡日行禮。是夕。舊識重逢。新知乍締。喜可知也。伉儷相得。忽又一年。一夕。宵闌將寐。猝傳邱老相召。崇道整衣而往。見堂上大燭如椽。堂下庭燎千百。照耀如白晝。邱老戎服佩劍。左右數百人。擐甲侍側。告崇道曰。余今夕將秣馬厲兵。出而與人角戰。然勝負未可決也。負則余將棄此而北矣。子可捩當行李。明日與吾女偕行。聞錢太守已陳臬西川。子其歸而安居矣。舊日積蓄萬金。余無所用。請以畀子。命左右舉革囊。置之崇道臥室。崇道方前致謝。將欲啟詞。邱老已離座起。出門躍馬去矣。崇道反告其女。女曰。吾已知之久矣。特不先告君耳。可早決行計。時臧獲已星散。忽有執炬者數十人。排闥直入曰。車已候門。請速行。捆載纍纍。約車十數輛。一時並發。行至半途。易車而舟。崇道從舟中遙望。但見火炬蜿蜒而東。有若長龍。舟既發。耳畔惟聞風浪聲。天明已抵潯陽江口。舟子皆關西彪形大漢。不煩指示。自知生家。革囊十。皆重百鈞。負之如無物。交付已了。遽辭去。不索一錢。附近鄰里。知崇道歸。咸來賀。因話昔年錢太守於君事。亦自悔孟浪。故不

復上詳。君今歸來，可高枕臥矣。崇道自歸後，意氣謙抑，頓更故態，與人晉接周旋，和藹可親。女亦了無異人處，閒時專習針黹，工刺繡，姻婭往來，罕有知其能武備者。時傳粵寇之警，消息日逼，女謂崇道曰：「此間正當衝要之區，非可久居。爰卜築於附郭三十里村堡中，俄而賊南犯，連陷郡縣，果如女言。有賊之游騎至近村者，村人殲之。女曰：『禍不遠矣。』遂命村人先自爲備，掘塹築砦，固守以拒賊。越日，賊果大至，女戒村人毋妄動，自與崇道設伏要道。俟賊過半，突出擊殺，賊輕其人少，環圍之三匝，女左右馳驟，每過處，賊首自隕，賊但覩刀光如匹練，竟莫辨人影也。崇道殺賊不如女，當其至處，無不辟易，是役也，賊殞無算，謂有神助，相戒莫敢犯。一村賴以保全，村人甚德之。賊平數年，一夕徙去。」

摺差

四川武弁某，賚摺入都，限日行三百里，憊甚。時月望後，白晝苦短，薄暮路逢古廟，天色已曛，思入廟暫憩，俟月出再行。下馬入廟，見衰草敗葉，填塞沒徑，並無僧

道佛殿二重。前殿正中供佛。香火斷絕。兩偏廂房。西已傾圮。東廂房中。停枯柩。雙扉半掩。殿後小院。檜樹數株。皆粗十圍。爰繫馬樹間。仍到前殿。矚佛座下。洞然中空。可容一人。四圍嵌木板。頗可避風。乃解佩刀。置佛龕中。展被座下。甫經偃仰。聞馬蹄聲自遠漸近。倏至廟前。姑就板竅窺之。月裁出山。形狀隱約可辨。前一老者乘馬。修髯垂胸。年約五十許。氣象壯偉。後一少年。徒步相從。貌亦魁梧。老者下馬。以鞭授少年。相將入廟。繫馬西楹。老者命鋪褥殿堦。居中端坐。少年屏息待立。意殊惶悚。忽聞老者叱曰。我自弱冠。浪跡江湖。雖藉獵獲爲生。然必取之有道。絲毫不敢狂悖。妄肆淫殺。有干天譴。至今三十餘年。幸逃法網。清夜捫心。未嘗不職此之故。不圖汝甫入吾門。便亂吾法。前日之役。若非我獨殿後。汝曹二十餘人。能一得生者乎。少年鞠躬對曰。唯唯。僉謂幸賴吾師虎威。各叨倖免。老者又冷笑曰。復聞其家有少婦。守節撫孤。汝入其室。旣污其母。又殺其雛。汝心安乎。似此惡毒殘忍。令人髮指。皇天有知。決不汝恕。一時徼倖漏網。終必不免於大辟。有日擒獲。實

爲吾黨之累。汝試思之。我尙能貸汝乎。少年聞之。倉皇伏地叩首曰。弟子罪該萬死。求師息怒。願受責罰。老者唾其面曰。汝尙欲求生乎。聖人之道。不外一恕字。汝家亦有婦孺。罹此慘辱。汝心甘乎。毋多言。拔所佩刀授之曰。速伏刃以謝寡婦。且慰孺子之魂。可也。少年果受刀。再拜自剄而死。老者起立。顧尸長嘆。拾刀拭血。弢而佩之。又自取褥覆馬背。牽出門外。乘之鞭馳而去。某聞之。歷歷初頗愕悸。以老者所言。居然盜不離道。不禁點首稱歎。月色將中。不敢再寢。將起趕路。突聞東廂嗽然有聲。厲如老梟。某大驚。姑再窺之。俄東廂房門啟。一物自內出。長丈許。徧體白毛蒙茸。走至院中。東向望月。目光睽陽。炯若擊電。俯視地上死尸。拊掌狂笑。試蹴以足。復佝身抱尸起。將首級摘擲地下。褫去衣服。始則就腔飲血。繼則咀齧嚼骨。齒牙軋軋。如貓食鼠。久之始盡。又將首級擲起。撩髮作渾脫舞。左盤右旋。樂不可支。隱隱遙聽村雞鳴。其物張皇四顧。擲去首級。復對月掀唇狂笑。拊掌者再。徐徐入東廂房去。某毛髮森豎。駭汗浹衣。悄起躡足。將所賚摺束被中。縛負背上。往

後院牽馬出門跨鞭疾馳約行五里許忽憶所佩刀脫置佛龕倉猝未及攜帶廟中死人尸爲怪物所食僅存首級衣服日後必爲疑讞刀上故鏤已姓名恐因刀牽連受累難免欲返身攜取又恐東廂怪物復出難與抵敵躊躇再四意難已鳴怪物當不足爲患決意策轉馬頭至廟下馬輕步趨赴佛龕取刀疾出果聞東廂房棺蓋格格作響駭甚飛身上馬絕塵疾馳五十里東方大明心始帖然

褚祚典

褚祚典明嘉靖時關中諸生也性豪誕好馳馬試劍尤善超距嘗與諸健兒較藝一躍能摩真定府銅佛頂諸健兒咋舌謹贊謝不及素嗜賭一擲千金立罄負輒與諸健兒伏莽探丸藉獵獲以償賭贖後以從征倭寇得官洊擢山東按察使平時所交綠林錦帆之徒暮夜又與往來遇大腹賈挾重貲必邀褚同獵取之褚亦自鳴得意樂與從事一時童謠有云君勿行郊藪陸有攔路虎君勿行江湖水有吞舟魚故凡估客舟車所至莫不惴惴患盜各有戒心撫君聞之以語褚曰道路

童謠君聞之乎。褚唯唯。撫軍正色曰。今外寇甫平。崔符未靖。商賈不通。民何聊生。君職司爽鳩。應爲民除害。坐視不理。將何以辭其責也。褚聞之。無任主臣。急檄所屬府州縣。嚴行緝盜。如敢姑息寬縱。立予糾劾不貸。各屬奉檄畏劾。疊限比捕。卒無所獲。時湖南有名捕梁科者。年七十餘。家居柴門。久已罷役。羣捕畏比。因饋貲具厚幣。遣使求助於梁。梁初以年老無能爲役固辭。既歛使者以酒。酒酣談少年時捕盜事。精悍之色。見於眉宇。使者拊掌贊嘆。故諛詞以激勵之。謂今盜風雖熾。均非公敵。如勉爲一行。使若曹知捕班中。尙有老廉頗在。當不敢爲。否則若曹不謂公年老。及笑公膽怯。當日之英雄掃地矣。竊爲惜之。梁不禁耳熱技癢。掀髯笑曰。汝激吾耶。不得已偕汝一行。可乎。使者大喜。稱善。不日同至山東。羣捕接見甚歡。僉謂疊囑盜蹤。實藏臬署。梁謂當偵確虛實。休得孟浪。乃日伏臬垣左右以伺之。一夜漏二下。果見一人躍垣而出。疾如飛鳥。漸逝。梁故善彈。老猶黑夜彈香火。百步之外。百不失一。漏四下。其人仍如飛鳥還。梁急援劔。扣鍔九。從垣下而彈。

其額聽牆外墮地有聲。知已中彈。詰旦復命。歷城令謂大盜斯得。令問盜何在。曰：在臬署。令叱曰：汝噤語耶。看臬署而爲捕盜數者。梁曰：小人已彈其額。公可白撫軍。急諭稽臬署人等。額有傷者。卽盜。盜復何遁。顧此宜速。不宜緩。緩則少縱。卽逝矣。令曰：然。急謁撫軍。謂大盜斯得。撫軍問盜何在。曰：在臬署。撫軍叱之曰：噤語耶。焉有臬署而爲捕盜數者。令曰：捕役已彈其額。公可召按察。急諭稽臬署人等。額有傷者。卽盜。盜復何遁。顧此宜速。不宜緩。緩則少縱。卽逝矣。撫軍曰：然。乃遣人召褚。褚辭以有疾。不可以風。請假一月。撫軍頓足讓之曰：此何事也。而可待至一月耶。令鞠躬進曰：此事關係甚重。如按察有疾。公可枉駕省視。固不失爲謙尊。况僚屬一體。必不得已。卽寢室亦可晤語。無須遠嫌引避也。撫軍然之。比至臬署。褚辭以不敢枉駕。有事。俟假滿謁見再議。撫軍執意省視其疾。褚益固辭。撫軍大疑。卽自下輿。徑入其寢室。褚蒙頭呻吟。不敢露面。撫軍命左右牽被而逼視之。見褚額墳起。纏以布帕。血涔涔外流。確係彈傷無疑也。撫軍瞪目詫曰：奇哉。大盜斯得。

我始固料不及此也。反署使人風褚，速自錄供待劾。褚料難掩飾，果據實直承爲盜不諱，撫軍特疏入告，勅卽正法。自褚伏誅後，盜蹤頓戢。

近代時期一

● 清代之劍俠上

祕密社會

明社旣屋，子遺黎民，抱攘夷主義，創爲祕密會社。豪傑之士，爭歸附之。雖未有效，然個中人輕生死，重然諾，疾病顛危相扶持，而復羣策羣力，誅鋤貪暴，其爲團體視晚近來醉心歐化者之所爲，殆有過之無不及者。滿清政府以其害己也，名之曰匪。衆人不察，亦從而匪之。再傳而後，忘其本旨，人格亦稍下矣。然而條律井嚴，組織完善，非無賴惡漢，無知識者之所能爲。有斷然者，其中大略言之，頗有趣味焉。

當滿清光緒之季年，朝多倖位，野多游民，政偷俗敝，於是此種祕密會社之勢力

日益膨脹。蔓延幾全中國。川滇兩廣湘黔諸省爲盛。支分派別。無統一機關。然能互相扶持。在遠不遺。其每落之組織。有行政司法交通秘書諸官守。會中人尙平等。相稱以兄弟。崇信義。均財貨。同患難。有似乎今之社會黨人。刑罰最嚴酷。有取耳。抉目。砍手足。上刀山。諸名色。受刑者以慷慨就命爲價值。呼手予手。呼足予足。無難色。無呻吟聲。則爲英雄。羣相贊美。其刑律頗繁。懸爲厲禁者。爲奸淫。虐殺。犯奸淫。虐殺。上刀山矣。會首曰老大哥。又曰老龍頭。聚會時以草束龍頭跨之。故名。聚會無定期。龍頭以命令行之。會集曰開山堂。每開山堂。至少亦數千人。其有改訂暗號。增損規條。則大舉。或至數十萬人。其品秩次於老龍頭者曰正龍頭。復次曰副龍頭。復次曰大哥。大哥有仁義禮智諸字號。以次坐列。中央置方桌。疊以椅。草束龍頭於其前。如此者凡三。三龍頭箕踞之。其裝束最奇特。著大袍。裹甲。頂盔。綴長雉尾。一足著靴。一足著草履。若曰江山未定。不遑寧處。有文事亦有武備也。其有新入會者。左手燃香一束。右手握刀。誓曰同復山河。死生以之。有逾此盟。

身如香分。則以刀斫香斷。星火燦然。儀式畢矣。相見禮節。亦絕簡單。老龍頭與正龍頭遇。舉兩手搖指搖之。副龍頭舉一手。大哥則以左手加右手之腕。有加至肘者。有至胸者。則皆下於大哥者也。其最下級。垂手矮身。故相遇一舉手。則知其爲個中人。且知其品秩。後爲官吏發覺。多所更改。遂不劃一。惟大會時仍搖指。隱語甚夥。有抄本盈寸。曰海底展轉傳抄。非外管事不能悉。外管事卽所謂交通部者也。隱語暗號。經一次修訂。則通告各山堂。山堂大者。轄及數省。小亦數府。惟不相統屬。故有隙則率其徒互毆。名打保子。死傷則掘土自掩。會員往來全國。不必名一錢。所至都會若市集。先謁外管。曰拜碼頭。對暗號。問隱語。曰拖條子。均符曰拖順。則引見老龍頭。介紹各兄弟。待以賓禮。他往復量程爲贖。豐殺視位之高下。穿窬小偷亦在會中。但賤視之。亦須拜碼頭。方得行竊。徵其所獲。十三四。以爲公費。需鉅款時。則拖隊伍。拖隊伍者。攬金越貨之代名詞也。由老龍頭遣兵調將。派諳練者領隊伺要隘。此領隊者名提口袋。號令所從出也。余客歲曾於洞庭舟中。

遇一人虬髯虎眉。舉止袒率。語樸誠而豪放。被酒後爲余言川中隊伍大家陳老三李麻子事。娓娓竟日。如掌上螺紋。聽至快意處。輒爲浮大白也。客之言曰。拖隊伍須有大研究。非可鹵莽從事也。全隊伍分內外二部。內部內管事掌之。主賞罰調遣約束。外部外管事掌之。司偵探調查事。旅人行囊之肥量程途之所從出。悉報告口袋。口袋示行期於內管事。及期誓師。衆圍坐。人有一酒碗。管事宣誓言已。執一雄雞割之。徧滴雞血於酒碗。衆大呼曰。遵命。則舉酒鯨飲。已。執械逕行。詣所預定之要隘。譬如駐隊三峽。則重慶宜昌沙市漢口。皆有專探。旅客一舉動無不知之。隊伍進行時。每人挈冰糖半斤。問所用曰。此新軍之水瓶也。冰糖能生津液。噙一粒。可走數十里。且取攜視水瓶便。故用之。每值敵人追緝時。則令善擊射者數十人爲殿。前隊押金帛。過要隘。插標記。殿者至此。須力禦數小時。至第二要隘。亦如之。如是數次。前隊已遠。則揚長俱逸。每一拖隊伍。所得輒數十萬。少亦數萬。千百所不屑也。如追者甚力。則遺銀一筭。帛數十束。曰買路錢。復相逼不捨。

則聚衆力戰，必有大死傷。川湘黔滇諸防營，深諳此道，得金帛後，遽反旆矣。鄂人某，宦川中，以善搜括聞，歷十餘年，頂珠紅矣。運動京中某權貴，得調江甯藩司。值秋高水涸，舟不可通，慮陸行多盜，嚴備之。舁行李者以千計，益以衛兵數百人，絡繹道上。綿亙至數里，聲勢甚赫。聞萬間有大盜曰陳老二，得部下報告，大喜，思攫取之。或言備嚴人多，著手不易，則掀髯笑曰：「老夫固操刀以割，目無全牛者也。」繼又續得報告，謂黃白約三數十萬，珠寶倍之。陳作色曰：「肥哉。」因選精壯者百餘人，牛五十頭，授以計，令如法泡製。陳所據山，驛路出其下，岡巒起伏，亘官道可十七八里。山下道旁，每五里許，有茆屋數十家，輒見酒帘飄揚風中。山中林木蒼翳，羊腸險巖，入其間者，第見翠嶂拔起，鳥道橫空而已。逾峻嶺百數十里，爲大江。蘆葦菁密，碎石如斗，小艇數十，潛藏水渚，凡有所得，初藏山中，嗣由此分運長江一帶。貨之，其所賴以爲尾閭之宣洩者如是。某旣抵蘇，傳有盜擬襲奪，不敢前，然延宕非計，且無可繞道，不得已，更益衛兵，令槍皆實子彈，備戰。日旰漸近山麓，見林

木甚惡。大疑。令騎者探而後進。復十餘里。路窄僅容一車馬。兩旁層崖如削。林木間。鴟鵂見人驚起。聲格磔。山谷某則大懼。以爲有盜則殆矣。已而漸出谷。竟無異。心稍安。復十數里。日已曛。而彌望荒落。忽見山坡間有一人類樵者。亟命人往詢近處有無小市集。樵曰。距此六七里。有居民數十家。可投宿。背山而路之。茆屋是也。過此以往。須四五十里。今日不及矣。問有強盜否。樵沈吟曰。盜卽不知。惟山中有虎。常出食人畜。吾儕皆畏之。言已。擔柴自去。問者以告某。某喜。陰念既有虎。殆無盜。且人多。虎亦不足畏。方凝想間。陡見前面高峯插天。衆憚登陟。相顧色駭。某頗以樵言自慰。亦不疑慮。已而果見有茆屋倚山臨路者數十家。鷄鳴狗吠。儼然村落。日已夕矣。於是遣人商宿處。此數十家中有爲客店者。有爲沽肆者。見大宗買賣。皆笑逐顏開。然人多不能容。行李輜重及某之眷屬。勉強得屋宇覆庇。餘人皆求蔭於大樹若巖石。安置粗定。村中人宰豬割雞。狀至忙碌。已又出藏釀餉。客酒味芳冽。而值綦廉。衆大悅。爭取飲。沽肆數家。有酒三數十甕。頃刻都盡。某見

兵士與昇夫皆露宿。已獨得安處。此頑固貪暴之專制國官吏。忽然有平等思想。心惴惴不自安。因向衆兵士鬻顏道歉。見衆方歡呼鯨飲。初無怨言。心始安帖。入夜。展轉不成寐。坐起四顧。纍纍堆疊者皆箱篋也。屋角土壁破處。秋風瑟瑟。燈影搖搖。屋頂有物垂垂。搖曳如流蘇。色黝黯。審視之。辨爲蛛絲。若塵繭。瞥見屋角有星光漏入。轉念天幸不雨。不然殆矣。忽聞遠遠有聲如狼嗥。響震山谷者。側耳審聽。則又非是。殆兵士及夫役鼾睡之齶聲也。因太息。時三鼓。方將睡去。忽呼嘯聲自遠而至。山鳴谷應。如風起水湧。聲勢萬千。乃大驚。知有變。急呼左右。無應者。遍蹴之。酣臥不能起動。有一二起者。駭絕無人色。不知所爲。而糾糾者執大刀。闊斧破扉入矣。提醒者反繫之。從容輦金帛財貨。并執主人以行。逾山岡。至一草塞。踞案高坐者。陳老三也。三數人曳某入。摔之使跪。某至此。知無幸。不敢自大。命跪即跪。不稍抗。老三含笑向之。熟視鬻顏。詢姓名籍貫官階。某俱告之。有乞憐意。老三大怒。拍案罵曰。狗官。怪道汝有如許啟發。原來以媚骨易得來。啟發者。彼等隱語。

蓋貨財也。某俯伏惶恐而對曰：是是，老三益大怒，戟指呵之曰：若爲監司大員，不惜對強盜作此態，可見汝不仁。搖尾乞憐狀，吾殺汝如殺一狗，直不屑以汝齷齪血污乃公刃。乃命健兒數輩，褫其衣，移數百斤巨石，壓其一手一足曰：明日當有人來救汝。歸後爲我告貪官污吏，刮地皮時勿太高興，須以汝爲鑒也。乃於山谷中牽牛數十頭至，分委所得輜重於牛背，驅之逕去。翌晨，衆蘇醒，店夥居民都已不知所之。視行李，則精華已去，糟粕僅在。主人又不知去向。於是衆皆迷惑，疑是噩夢。嗣有大膽者，得主人於山半草屋中，一手一足已折，惟呼吸尙不絕如縷。救之得活，眷口幸無恙，差堪自慰。然自是殘廢，以貧病終。同時有李麻子者，川西隊伍之豪也。一日打大敗仗，而追騎緊逼，連戰三晝夜，終不得脫。黨人罷甚，擬棄所得以逃。李咄之曰：棄則心散，各自顧復能相救耶？且四面合圍，散逃安之？是皆死矣。前有古刹，趨之。吾自有脫險計。衆如命趨刹中，圍扉加石。追者至，圍之數匝。李命從者出餼糧，焚敗扉亂草以爲食。敵有乘垣者，李出手槍擊之，墮二人。敵不敢

逼乃從容圍坐而食。食已疾呼裝礮。則各向腰際出鐵圈一。圈有螺旋。逐節聯合之。頃刻間成一巨礮。入藥數升。碎破斧爲彈。數人肩之。一人執火立其後。料量已自關其門。門關礮發。仆敵數十人。卽冒煙衝出。繼以排槍。敵驚潰。無敢再追者。李命遺銀二簫。以賻死者曰。吾儕殺人。非得已也。此所謂盜亦有道者。非歟。厥後李麻子之名大噪。徒亦日衆。川西隊伍有李字旗。無敢問者。革命軍起義前一月。川中因鐵路起事。其爲官兵勁敵者。實陳李之徒黨云。

劉海頭

楓溪位江浙之交。富物產。饒魚米。水程四達。交通便利。以是故船舶櫛比。帆檣林立。齋所供以來。挾所求以去。業買遷。任輸運者。蓋十六七焉。鎮口故多六陳行。某行者巨擘也。所傭工人以數十計。傭中有王二者。察其年鬢。已在六旬外。供指揮效奔走者。數十年於茲矣。雖年華遲暮。而絕無頹狀。負重致遠。安之若素。且宅心端謹。操行長厚。忠所事。勤厥職。終始如一。與社會交。無或忤者。同事多少年。尙

意氣恒以細故相鬥爭。王二知之，必竭誠爲之排解。上流社會中，莫不多其高義，以爲若王二者，其勞勩界之魯仲連哉。顧王二實非楓溪產，彼既未言所自，至衆亦莫識所從來。初來操北音，居久漸同化，卽生長是間者，亦幾以土著視之。惟其形體上有特殊之處，足以喚起衆人之注意。蓋頂際髮禿，成橢圓形，光潔如鏡，一毛不生。每值理髮，人恒見之，輒猜疑駭怪。俗於幼兒，往往刪薙頂髮，而蓄其四周，謂之劉海頭。然必頻頻芟刈，始克保其頂上圓光，設不爾者，不出卅月，新髮滋生，長短混合，界限且立泯。今王二老矣，乃作此狀，且閱數十寒暑，絕不加以刪薙，寧非情之至奇，而理之所不可測哉。衆以此致詰，王二輒目笑存之，未嘗置答也。尤可異者，在此長期歲月中，王二除與土著周旋外，從未有片鱗隻雁之往還。一若無所謂宗族，無所謂親戚，并無所謂故鄉也者。守獨身之主義，終歲勤動，迄未少休。怡然泰然，狀頗自得。生平重公理，輕強權，好斥己財，以周人急，不責償，亦無德色。跡其一言一行，不獨爲勞勩界極良之模範，卽衡諸釋氏慈悲，老氏清淨，耶穌

孔子博愛汎愛之作用。要亦未嘗背也。以此故。衆雖對於王二之形體上交際上。不能無訝。卒未疑其生平挾有絕大之秘密也。會行中少年與酒坊工人有嫌。一日。遇於茶肆。遂鬪。行中少年勝。乃欣然唱凱歸。酒坊工人。意不能平。乃大集徒衆。操械直薄少年行。當街而陣。譁噪鼎沸。屋瓦爲震。行中司事。類文弱。不任戰鬥。驟膺此變。咸惶急汗下。不敢作左右袒。而少年殊強項。耻爲城下盟。遂共起覓械。謀突出衝擊。先搥其中堅。則左右翼亦且瓦解。正危急間。王二適歸。見狀。急橫身衆中。苦口勸止。顧人數既多。聲音遂雜。意旨亦歧。王二知難理喻。乃抗聲謂衆曰。諸君誠欲鬥。盍先與老夫角。老夫有薄技在。願貢獻諸君。前語未絕。一躍而起。手攀檐牙。懸身空際。自西徂東。左右移換。一刹那間。去已數丈。觀者目不暇瞬。而王二早又自東徂西。還抵故處。悠然而下。呼吸舒適。顏色安靜。若行所無事也者。衆乃大驚。張口結舌。不能措一詞。王二知兩方銳氣已沮。乃藹然致詞曰。諸君幸恕我。前言戲之耳。充我之量。何敢與諸君鬥。即諸君亦何忍與我鬥。第尙有數言奉勸。

諸君愚者千慮。容有一得。良藥苦口。利於病。忠言逆耳。利於行。諸君幸恕我。能容我。畢其說乎。衆皆曰諾。王二乃續言曰。吾人終歲勤動。雖勞不怨。以膂力博金錢者。非爲個人衣食計乎。曰然。曰。吾人自食其力。溫飽有資。而尙求盈餘者。非爲仰事俯蓄計乎。曰然。曰。吾人一身。關係於家庭者。如此其重。則吾人一身之安全自由。非父母所祈禱。妻子所希望。視爲最大之幸福者乎。曰然。曰。然則善矣。諸君試一返省。頃間事倘非中止。則此際當已不堪設想。甘舉家庭之幸福。以爲犧牲。其果持有不共戴天之理由在乎。衆廢然無以應。王二游目一周。慨然興歎曰。察諸君狀態。殆細故也。細故不能忍。而啟口舌之爭。已足傷和氣。乃口舌不已。繼以角力。角力不已。繼以械鬥。兵刃詎有耳目。戕賊乃在意中。不幸而敗。小則傷殘肢體。大則危害生命。諸君各有家庭。試一設身處地。其憂悼痛苦。當復何如。卽幸而勝。且幸而大獲全勝。敵我者盡受摧殘。無敢與抗。甚至望影爭逃。聞聲破膽。諸君得此快舉。當必趾高氣揚。侈然自雄。獨不念被害者之家庭。其果肯默爾而息否。一

經涉訟。縱不論抵。亦須破家。或亡命而走江湖。或被囚以送日月。有家園而欲歸不得。有眷屬而室邇人遐。旁皇歧路之中。太息鐵窗之下。悔之不已。晚乎械鬥之害。至於或勝或敗。均足陷身於禍淵。而未由自拔。諸君。諸君。請思之。請三思之。王二之言。果有當否也。衆聆此一席真誠之演說。分疏利害。至爲痛切。不覺逞志肆憤之心殺。而憂危慮禍之念生。有變色者。有微歎者。有垂首至臆者。旁觀者乃同聲稱歎。謂王二所言。無異金玉。行主以及司事。遂亦乘機繼進。調停其間。一天風雨。頃刻都收。化仇敵以爲朋友。舍兵刃而執酒杯。僉謂非王二之力不及此。於是公推王二居首坐。王二堅辭弗敢當。衆勸之益苦。不獲已。告罪就席。吳越一家。縱飲極歡。而衆目睽睽。交集於王二之身。大有看殺東坡之勢。少壯者羨其有超羣出類之手段。而相率傾心。卽老耄者亦深佩其具驚人之藝業。而獨能深藏不露。自視若無寸長。以善養其浩然之氣。至行主則以利害切身。崇拜尤至。謂似此絕技。料必傳自異人。席間本以王二爲唯一之談資。此言一出。四座譁應。于是因師

資之異。而聯想及於形體之異。乃有前席而請者曰。君頂際所以不毛者。個中必有特別之原因。我屬懷疑久矣。幸開誠相示。毋俾永處葫蘆中。把沒頭鵝。生生悶殺也。王二默然良久。知更欲深閉固拒。爲勢大難。乃喟然曰。諸君幸少安。王二偷生於此。數十年矣。方私心竊喜。以爲夕陽無限好。畢竟近黃昏。一旦攫疾病。填溝壑。則少年時代之傷心史。將携之同埋黃土。不復留絲毫影象於人間。甯非計之得者。詎知目的垂達。而阻力橫生。俱我目擊危機。無術挽救。遂致不暇審思。急出其薄藝片長。極意炫露。冀以消沮兩方之銳氣。就我範圍。乃徐用我調和之手腕。俾不至終於決裂。顧事雖倖成。而我數十年韜晦之苦心。至此盡歸泡幻。一失足成千古恨。雖經痛自懺悔。卒不能消滅於無形。嗟夫痛哉。天實爲之。謂之何哉。言次一再歎息。淚皆瑩然。蓋已奪眶而出矣。衆人對於王二。初固不疑其有他。第爲好奇之念所驅迫。始衆口一詞。交致研詰。以爲乃如之人。操行之誠摯。旣如彼。藝業之卑絕。又如此。則推想其少年時代之歷史。與所以造成此獨一無二之劉海。

頭之原因。當必有可驚可喜者在。以是故爭欲探得其究竟。以爲快。今察王二詞色。似甚慚恨。始和平時所揣測者。強半謬誤。轉悔現在之質問。未免不情。因而衆胸輓轡。忐忑不已。有思出而表示意見。俾擇可言者言之。毋強人以太難。顧略一濡濡。而王二之言發矣。曰諸君乎。亦知諸君所加以青眼。與之接坐者。乃一漏網之盜乎。今盡以所經歷者爲諸君告。天鑒在茲。予無僞言。第有一端。不能不終欺諸君者。蓋現有之姓名非真也。所以不舉真姓名相告者。誠不忍辱及所生於死後。諸君乎。其能哀而許之乎。衆聞言。轉益驚駭。蓋不意若人之爲盜也。相顧愕然。無可置答。乃相與頷之以首。停樽罷飲。悄然以聽。王二乃續言曰。予生於田野。未嘗學問。三歲失恃。依父以生。不幸纔及十齡。而又失所怙。旣無恒產。足以自全。乃傭於前村某氏。爲牧牛羊。三數年間。艱苦備嘗。願軀體堅實。膂力富有。每與鄰近牧童角。無弗勝者。一日。受予侮者。力圖報復。乃聯合十餘輩。要遮於道。將合力踣予。用雪積憤。顧予雖居劣勢。意氣殊不少挫。轉出其巧智。奮鬥而前。蹈瑕抵隙。當

者輒靡。彼等知終不能勝，譁然而奔。或遙立相詈，見予奮步欲追，乃四遁無敢返門。是時心膽開張，意氣踔厲，自謂古豪傑若張飛、趙子龍輩，於百萬軍中馳突而歸，想其顧盼自雄，當亦類是。正遐想間，陡覺有人拍予肩，回首視之，則見健男子一年事壯盛，氣概昂然，方顧予而笑曰：「予觀子鬥久矣，孺子可教也。予適因勝而驕，而客又譽我，則欣欣然喜，相與周旋，謹問先生何來。客不待詞畢，即僂言曰：『予來歷子勿必問，要之非禍子者。以若身手，苟得明師爲之指授，武技當臻上乘。今局促如轅下駒，與草木同腐朽，甚可惜也。蓋棄爾牛羊，從我游乎？』予時僅十三齡，疏於慮患，感情至爲簡單。客旣自言非禍我者，換言之即福我者，且人生得一知己，死可無憾。若客之一見垂青，雖欲不引爲知己，不可得也。顧欲棄去牛羊，恐牛且踐禾稼，羊或亡去，意無以對主人。客見予沈沈以思，遂促之曰：『決乎？抑尙作戀棧想也？』予乃舉意所躊躇者以告。客笑曰：『子誠長厚哉。雖然，今日之世界，決無長厚者角逐之餘地。第子旣作此想，予姑俟子於此，脫越兩小時不返者，予從此逝。』

矣。予既得請，乃大喜。斯時從游之熱度，殆達沸點，遂急驅牛羊返。羊故馴甚，就驅即銜尾行，遵綠楊堤畔，曲折而歸。惟老牛殊蠢蠢，不解人意。若以予急急欲前，而彼故遲遲其步，以虛耗我黃金之晷刻。且頻頻噓氣，氣從鼻孔出，鋪然有聲。其果以惜別而然，抑逆知此去弗能得善果，欲泥予行，俾予後期耶？若然，則其意良厚。惜予志專意一，無復二三，轉深恨此牛規行矩步。學村中冬烘先生所爲，行且誤予事，乃頻以箠楚報之。嗟夫！諸君，予負此老牛多矣，無何，抵主人所，乃以牛羊歸主人。返身徑行，主人以予數數侮村鄰，不予留，亦不予詰。予乃跳躍而前，竊慮往返需時，客或不能待，且行且視日影垂及故處，引領以望，人影渺然，心躍躍幾自口中出。及穿過綠楊堤，而客故尙在，殆以獨立無俚，遂倚樹根少息。見予至，一躍而起，曰：孺子良可嘉，乃未後期。予今弟若，若且師予，行且與若適彼樂土。予唯唯從之，行方自喜，幸運照臨，乃得此意外之提携。又甯知畢生之惡運，實爲此意外之提携所構造者哉！行行重行行，入山深復深，始抵一莊。師曰：至矣，游目四顧，峰

嶺層疊。林木陰森。似荒落隔絕塵境。闢門而入。一少年趨而出。師曰。此師兄也。命以兄禮事之。是日以奔走勞苦。速僕具餐。餐多肉類。食之頗甘。果腹後。立命師兄導予休息。予獨居一室。室雖不甚廣。亦頗修潔。遂以爲此間樂不思蜀矣。酣然一覺。魂夢亦甜。翌日。師兄速予起。問師所在。則已他出。因丐師兄導游全莊。莊中房舍甚多。然皆鎖閉。謂供客下榻者。莊後有樓一。巍然高聳。憑欄四望。見廣場中。器械雜陳。凡足以發展體力者。無弗備。予甚樂之。游竟。偕師兄餐。餐時細詢。始知除師弟外。有僕三四輩。司門司炊。問師究何所事。則掉首笑曰。久自知之。何喋喋爲。予遂不復煩瀆。自此每果腹後。則就師兄習兵刃。暇則奔走山徑間。師還亦就與指點。不三載。技大進。師乃授予以飛行術。又三載。而超越重垣。有類踰闕。時聞師言。此子藝業已成。可出而問世矣。顧師恒喜獨出。問與師兄俱。去五六日。或十餘日。歸則囊中金貲充焉。至是而吾師所事。予心蓋已了了。向例山莊讌客。歲凡二度。一在春之仲。一在秋之季。及期客大集。列室爲滿。椎牛蒸羊。肆筵莊後。危樓中。

痛飲三日。始各鳥獸散。跡其所言。類多殺人越貨之事。獨怪客之來多以騎。而師之出輒以徒。乃乘間質諸師兄。兄笑曰。弟既預知。兄復何諱。且弟亦劇中人。登場獻技。爲期當復匪遠。至懷疑之點。良易解釋。蓋吾師武藝超絕等倫。脚程之捷。捷於奔馬。安用騎爲。抑師尤習暗兵。百步之內。飛鳥莫能遁。蓋袖弩也。弩制絕奇。鍊鋼爲管。形成六棱。長凡九寸。中藏六矢。而設機關於管底。發時指臂相應。略事轉旋。矢卽聯續而出。以是種種。北道豪俊。胥受指揮。與會諸客。皆羽翼也。予聞言爲之駭然。又閱半載。師忽命予偕行。而以師兄留守。予雖心知爲盜之非義。顧一念受師厚恩。背之不祥。乃決然從之。行陸行凡數日。所至均如歸。居停主人。大抵似曾相識者。給奉倍極誠敬。一日之夕。師命易夜行衣。易竟從師自窗間出。飛行屋脊。師曲折前進。絕無顧慮。若甚習此途徑者。無他。凡所屬意。師輒先事爲詳細之調查。其携予曹。亦聊爲助手而已。須臾達目的地。縛其主人。而大索其金幣。臨行乃割其耳鼻以去。予心良弗忍。以爲旣刦其財。復傷其身。是又胡爲者。途次弗敢

問，恐屬垣有耳也。比抵故居，始質疑於師。師曰：若亦知所虐遇者，爲何如人乎？溯彼自邑令起家，輾轉夤緣，不數年遂位至司道。對上則不惜苞苴，對下則百方搜刮，枉法酷刑，以濟其欲。無辜之民，竹肉鼓吹於堂下，銜冤埋恨於獄中者，蓋不知凡幾。我今割彼耳鼻，不過聊示薄懲。若以罪案相衡，所以寬假者正不少也。而若乃色變眉蹙，一似深憫其无妄，而病予之過當也者，不其慎哉！予受斥責，唯唯無敢置辯。顧意竊以爲未愜。若彼人者，想其浪作威福，多殺不辜，雖戕賊其生命，解剖其軀殼，正足一洩民間冤憤。捫心當自泰然，所以不安於心者，以盜其財耳。旣盜其財，是彼爲盜民之盜，而我爲盜官之盜，等是盜也。又何優劣之分？且使彼人具有能力，出而抵抗，我屬爲自衛計，乃不得已而加以傷殘，猶可說也。今則施其暴行於抵抗力全失之人，寧得謂武。綠林豪客，無不以俠士自居，曾卑劣若是，而玷污俠士之名哉！予雖微不滿於師之所爲，然積久亦漸忘。寧知不出三月，而至殘極忍，痛心刻骨之慘劇。又發現於予眼，永鐫於予腦，俾予至今耿耿也。某日之

午。師忽自外歸。立命予兄弟整飭行事。選擇利器。務求狎手。師亦取倭刀繫腰下。刀故寶物。長不踰二尺。其薄如紙。而精液飽滿。寒芒作作。不可逼視。相傳能斷金切玉。或且不妄。師固未嘗輕用。卽三人同行。亦僅見也。予等弟兄。知此行必極重要。遂亦磨礪以須。俾便及鋒而試。設備既竟。取次下山。曉行夜宿。凡七日。始抵一巨鎮。鎮之口巨室巍然。主者夙以豪富震一時。蓋所求者在是矣。是日夜方半。三人皆輕裝短扎。負刃疾行。既抵宅後。師乃爲簡明之部勒。及掌聲一起。相繼超躍。直上危垣。凡經庭院數里。始抵一處。高樓四繞。迴環可通。樓中燈火通明。予遵守預定之約束。抽刀在手。巡視對檐。師則倒懸檐際。以刃啟窗。俄而窗竟洞啟。師兄乃類燕子穿簾。一閃而入。師亦繼進。予在對檐。正堪平視。遙見樓中廂櫃兩行。中設一榻。羅帳垂焉。師兄舉刀挑帳。不知何所見聞。師忽色變。穿窗先出。一轉瞬間。師兄亦出。予知爲勢非佳。急返身遵舊路行。偶一回首。追者已至。蓋一紅衣女子也。予急飛越危垣。方思潛伏草際。師已踵至。師兄少遲亦至。顧似受有傷痕。倒地

呻吟師忽疾趨而前。予以爲必加援助。詎意手起刀落。頃之呻吟不絕者。至是乃絕無聲息。雖在黑夜。未能明瞭。然以理推之。知必無倖。痛哉痛哉。予與師兄處。屈指凡七年。予之得窺門徑者。實食兄賜。雖屬異姓。而友愛之忱。有逾同胞。今乃目擊其慘死於此。且不死於敵。而死於師。死而有知。目其瞑乎。予方痛極欲號。師突返捉予臂。相將急遁。嗟夫諸君。獸雖至獷。不殘其類。師固儼然人也。胡忍而出此。輾轉推究。予卒不得其解。旣出險。終日忽忽。如有所失。師見予鬱伊弗能堪。所以慰藉者甚至。顧予終悒悒無懽時。往往輟食而吁。撫枕而悲。蓋回首故交。不由心折骨驚。魂酸夢咽。往車覆矣。來軫云何。他日者予躓而顛。能不爲兄之續乎。一念及此。悲兄卽以自悲。然欲遁而之他。則師之權力絕偉。羽翼旣多。耳目自遠。設旣遁而復爲所得。則死期立至。不得已鬱鬱久居。忍而與之終古。師嘗自言。此仇必復。予思復仇耶。仇果爲誰。抑曩日持利刃以碎兄腦者。乃非師耶。越二月。師果大集儔侶。會於山莊。誓不得當不返。議旣定。選藝業卓絕者六人。師自率以當其衝。

而命予等隨其後。及馳抵巨宅，仍一一踰垣入，環布樓櫓。師乃聯發袖弩，洞窗而入。蓋欲誘之使出，俾陷於伏中。迨矢三發，而窗已豁然開。紅衣女子依檻立，叱曰：若曹殆不欲生耶？語聲未絕，陡見寒光一道，疾於閃電。一剎那間，師已喪元。衆大驚急遁，而寒光已逐其後。步履少遲，身首立殊。但覺冷氣森然，直拂予首。自墻急墮，幸保首領。然已髮斷冠摧矣。此後雖皮膚完好，而毛髮不生，遂永留此危險之記念。乃變姓名南行，漫游至此。重承不鄙，猥見錄用。從前種種，譬如昨日死。以後種種，譬如今日生。折節向善，深自韜晦，以期懺除夙業，消滅污名。乃上帝不許，卒令自白於諸君之前。因歎作僞者之心勞而日拙也。言次，感慨唏噓，泣數行下。衆悲其遇，哀其志，嘉其悔過之勇，而重其賦性之真。有弔之者，有慰之者，而絕無輕之賤之者。相與洗盞更酌，盡歡而罷。夜如何其？夜向晨。家家扶得醉人歸，質明視之，王二已烏有。後有人遇之於焦山，并四周之髮，亦已一掃而空。蓋已皈命空王。

陸峒將軍

保甯鄉民甲乙異母兄弟也。甲爲人凶悖不法。日從無賴數輩。求鄰里間隙。凌藉挾詐。靡不爲也。乙雖幼。心非之。以是兄弟不相能。已而父卒。甲逐乙出。專有家業。乙時十六。伶仃困頓。無家可歸。乃走入山中。山中有祖墓在焉。伏墓前痛哭。久之。日暮。風颯颯有聲。一虎自竹林中來。乙念投虎口亦佳。徑前迎之。虎遂銜乙去。明日樵者有得破帽敝履於山中者。且微有血點。驗爲乙物。謂乙飽虎吻矣。甲聞之。泰然不以爲念。如是者又數年。卒以索詐鄉人。訟於縣。縣令素以武健爲治者也。廉得其情。立斃杖下。甲旣死。賸一妻一子。子年才十餘。妻不能守。挾子他適。所適亦一無賴。甲舊友也。其人尤醜且暴。每日晨。使甲子出牧牛田間。暮而醉歸。又毆撻之。以資遣興。衣不障寒。食不充腹。憔悴殆不成人。其母雖哀之。而畏甲暴。不敢言也。一夕甲子爲後父溫酒。酒熱裂其瓶。知不免。涕泣投地自陳。遽遭毒撻。氣噎而死。其後父猶拍案痛詈。聲動四鄰。是時月光初上。茅屋數間。在暮色中。鷄犬皆

靜。獨無賴申申未已。忽一人跨黑驢匆匆自遠來。直穿村而過。聞訾聲。遽止步叩門。無賴方怒。卽自出啟關。見不相識。立施以惡聲。來人亦怒曰。鼠輩今日尙敢爾耶。摔其頸仆於地。手鞭痛挾之。無賴負痛不敢再啓口。來人鞭數百。見兒殞於庭。遽悲曰。我來遲。苦吾姪矣。卽前抱兒起。無賴妻初疑暴客。至是審音鑑貌。果乙也。卽呼曰。叔乃尙在耶。乙迴顧曰。汝今誰家人。吾又誰叔也。左挾兒。右把鞭。一躍登驢去。無賴知爲乙。更不敢爭。然自背至股。皮肉悉狼藉矣。明日使人偵之。則乙止於二十里之某村。至已十餘日。且以手術蘇其姪矣。於是村人皆以爲異。爭就問訊。乙曰。吾之爲虎銜去也。虎一躍踰澗。直至山後。忽若有所觸者。擲我於地。奮聲大吼。響震林木。凡三四聲。不動。卽有數人衣黑衣來扶我起。視虎則飛矢貫其胸斃矣。黑衣者挾我行百步。有鐵面虬髯人。被盛甲跨駿馬來。黑衣人皆伏。且推我令伏。馬上人詢我身世。具以對。馬上人問我願歸乎。願留乎。我答曰。願留。馬上人卽命補爲黑衣隊卒。朝夕從諸人練武。我私問伍者。此爲何人。同伍者曰。此陸峒。

將軍也。將軍馭吾儕嚴而有恩。每月率衆大獵一次。所獲均分。餘時禁不得出營門一步。營中有操場。有教師。凡兵器皆具。聽吾人各就所好者習之。每次出獵。合圍擊刺。皆勒以兵法。顧歸路去路。每次不同。卽所至之地亦異。我在彼。凡從獵三十餘次。始終不知其何地也。一月以前。將軍容忽顰蹙。若有憂色者。衆咸疑之。莫測其故。俄而召吾儕至一所。鑄鐵爲門。垣墉甚固。入之庫也。積銀帛如山。將軍命吾儕任意取之。以力所勝爲度。我因取銀兩錠。帛十疋。將軍命自後戶出。且曰。見桃花而左轉。汝可返矣。於是如言從山中曲折行。不意果得至村。因出所獲治家業。與姪躬耕自給。無賴後亦知之。乃誣乙爲盜。并謂將軍者盜魁也。令鞠乙。乙言信有之。不知是盜否。令亦疑。使健役數人從乙入山。反覆求之。無所得。乙竟以鄉鄰保而出。乙本農人。一夫數年。竟能武藝。且以技擊甲於其鄉云。

鱘頭陀

客有自浙來者。爲言鱘頭陀。蓋百年前事。得之故老傳聞者也。客曰。浙之天台雁

蕩以山水甲天下。人之慕名勝。好風雅者趨焉。嘗有知名士數人。以九日登天台。爲黃花之會。吟詩傳盞。相顧甚得。忽層巒間一僧。荷薪行歌而來。敝衣布履。髮鬢鬢齊眉。見客方飲啖。卽釋擔而前。不辭而據上坐。手撮肉數片。仰吞之。傾壺就口。一吸而酒盡。衆顧之怪訝。然覩其貌。獐亦微懾。不敢侮。僧見紙筆及詩稿。笑曰。諸君大風雅。爲此好事耶。援筆濡墨。亦題一詩石壁上。長笑而去。衆視其字。作米顛草。詩有海風萬里吹衣袂。一髮天南自在青之句。各顧所作。嘆弗如也。悔不及問訊。是晚宿國清寺。則僧在廚下執爨。見衆人。仍操作往來如故。若不記有日間事者。衆就與談。僧自稱鬘頭陀。問以何處人。及何時出家。皆搖頭言不知也。與之言詩。僧仍不答。明晨衆相約觀日出。天未明。卽鼓勇登前山。遙見有人立峯頂。霧靄中。東向而望。至前則乃頭陀也。兩手結蓮花印。向日誦佛號。少頃。日自海上來。紅霞一片。左右捧之。照見四山草木巖石。皆作虹彩。還覘下方。猶黑暗沉沉也。衆嘖嘖稱嘆。或有爲風輪星氣之談者。方酣暢。忽狂風自左來。草木盡偃。頭陀遽迴顧。

曰。猛獸至矣。諸君毋動。風始過。一虎跳躑而前。衆戰慄。幾不能起。頭陀袒臂搏之。虎絕頷而仆。僧荷死虎去。衆良久神定。始相扶下山。入寺少息。不見頭陀。乃歸。出寺不數里。頭陀忽提一食盒來。啓之。酒食滿焉。謂衆曰。前叨擾。今以此報可乎。衆方饑渴。就道旁列坐。肴中物美而腴。色白如腐。衆詫爲未見。僧曰。此虎髓也。食之益氣力。乃飽餐去。逾年有人更游天台。問巖頭陀。則久去矣。問去何所。則不知也。蕭山來夢珊者。亦當日衆中之一人。後十餘年。自豫藩幕假歸。道淮北。淮北盜藪也。來甚懼。藩署衛兵甲乙者。皆以勇聞。故盜也使送來歸。二人有異志。覘知方伯贈來之千金在篋中。謀攘之。每次舍輒以盜警恐嚇。來書生怯懦。俯頭聽之而已。數日入歸德界。兩人故促車入歧途。日暮。突入一大林中。甲乙各抽刀叱御者止。遂曳來自車中出。與御者對縛大樹上。獰笑曰。來先生十日來驚恐否。先生患寇盜。今日送先生至地府。彼處安穩無驚恐。可常駐也。御者哀求。來瞑目不語。須臾眼前刀光一閃。以爲刃下矣。隱忍不動。耳畔忽聞甲乙叩首稱死罪。視之。曩頭陀

也。手戒刀，怒氣彪彪然。甲乙則列跪於旁。頭陀神采亦猶昔。謂來曰：今日倖遇，稍遲則無及矣。命甲起，爲二人解其縛。乙覘頭陀稍暇，猝自地躍起，一竄數丈，欲逃去。僧顧哂曰：鼠子尙爾耶！一揮手，鐵丸橫飛出，乙已仆百步外。甲解繩訖，頭陀卽以繩縛之於樹，戟指數之曰：我使汝二人送書少室，而汝不返命，罪一也。又構陷某兄弟，引官兵跡我於陸渾山中，幸我早避，不然，遭汝毒手矣，罪二也。作衛隊以後，誣良罔善，前後傾陷七十餘人，罪三也。甲俯頭無言。頭陀又言曰：我當初收汝部下，何等看待者？衆兄弟又於汝何等親睦，汝生變心，究因何故？甲亦無言。頭陀笑曰：今不汝容矣。白刃一揮，人頭與樹齊斷。顧御者促馳，又十數里，河橫於前，頭陀出簷簾吹之，卽有舟自隔岸葦中來，渡三人過。有茅茨百餘間，臨水居，四面皆湖蕩也。頭陀與來宿焉，抵足談竟夜，皆豫省吏治事，其民間疾苦，州郡貪廉甚悉。乃知頭陀蓋有心人也。質明，夢珊辭頭陀欲行，頭陀止之曰：無躁，此間伏莽遍地，皆是君胡能獨行者。命左右往前岡召吾兒來，日未中，馬蹄得得，一十六七少年

躍馬至。頭陀指夢珊曰：「此來伯父，可下拜。」少年拜。頭陀曰：「酒來，請來上坐，自與少年旁坐。」酒酣，頭陀舉杯曰：「比有事相託，未知君能擔此任否？」夢珊曰：「今日蒙師援救，得脫虎口，此身師賜也，力倘能任，何敢惜之。」僧指少年曰：「欲以此兒奉託耳。」來瞿然不解。僧曰：「君以渠真我子耶？」渠名崑，十年前顧侍御之子也。顧侍御者，以事忤清權相和珅，身被殺，闔門屠戮者也。夢珊父故與舊識，特以懼禍，故不敢問其家事。耳聞頭陀言，不禁嘆息曰：「冤哉！顧侍御乎？」頭陀曰：「君識之耶？」夢珊曰：「是先父丙申歲同年也。」頭陀曰：「如此則君當可力擔此責矣。」來曰：「是固願也，但不知師意欲何爲？」頭陀指少年曰：「渠衣冠子弟，此間雖好，豈能久留？曩者渠家被禍之際，渠年方幼小，僕與侍御以金蘭之誼，從權撫養於此。今幸天眷善人，使之有後，又復少年英挺，材兼文武。若聽其沒沒於此，豈當時救渠之意耶？今從君去，如有機會，幸卵翼之，俾昌復其門閭。且君跋涉長途，得渠爲伴，亦可無萑苻之警。此一舉兩得也。」夢珊許諾。明日，少年從夢珊行，再拜辭頭陀。流涕不止。頭陀揮手曰：「汝去無

多言果有心者。他日於國清寺韋陀像後尋我足矣。少年遂行。夢珊詢少年於文史。皆頗具根柢。騎射擊刺尤豪壯過人。皆頭陀所教也。詢頭陀落草始末。少年亦不知。但云頭陀嘗爲秦甯守備。時父亦游幕其地。言談相得。因結爲兄弟焉。已而別去。被難之日。全家方監禁班房中。頭陀穿窗直入。疾如電。遽挾以去。州兵數百攢矢如雨。頭陀撥以刀無中者。一躍越峻垣數重而去。夢珊約計其年時。則曩登高之後數日也。塗中果安靖無恙。少年留夢珊家。更名復。又數年。竟取科第。至翰苑。會和坤之奸發。清主誅之。數日。視其首則別一人。衆疑訝不敢言。是年復遂投劾去。一日至天台。訪國清寺求頭陀不得。夢珊疑之。乃同往尋焉。啟韋陀背。於像腹得素紙。則頭陀手繪己像也。復心終不釋。仍至歸德。則彌望者白葦黃茅。人室俱遠矣。乃慟哭而返。奉頭陀像歲時祭之。如祖禰焉。

鄭澍

清雍乾間。蜀中有劍客曰金飛者。學於甘隴。深思力索。凡二十年。竟悟不傳之秘。

歸蜀後。開門授徒。至者千人。人自期爲崑崙摩勒也。飛教之初。無他。惟授鍊目練臂之法。日一審視。課其勤惰而已。如是三年。好攘臂者斥之。好撫劍者奪之。徒曰。師簡我也。紛紛而散。從者僅數十人。亦疑師之無技也。請試以示。飛使數十人。手握豆盈把。塗以朱墨而擲之。飛禦以劍。豆盡而身無痕。乃命徒拾豆視之。凡豆上皆著劍痕。於是始服其術之工也。爭請益。飛曰。此豈可躡進者。汝曹腕力未靈。目光未聚。雖教汝輩不能爲也。衆力請。飛乃授以螭蝶雙飛之勢。衆試之。疾則人劍相糾而傷。徐則人劍相妨而滯。衆知不可猝就。乃去。飛嘆曰。千古奇術。豈絕於斯耶。吾旣得之。豈可輕棄。乃衍劍術爲八母九勢七十二步三百五十手。著書記之。精思三月。乃克成書。藏之小閣。不輕示人也。飛之鄰有鄭秀才澍者。亦稍學武。慕飛術。納交焉。飛生平自劍術而外。惟好醇醪。名馬。澍投其所好。日與馳騁郊原。沉酣酒市。飛甚得意。澍請學劍。飛仍以教諸弟子者教之。澍受教不懈。如是者三年。終不變。飛乃以劍術授之。月餘。飛自郊外來。遙見城闔有鬪者。勇捷特甚。馬上矚

之。樹也。策馬自他道返。由是疏樹。樹偵知其故。度飛必不肯更授。亦不復至。數日後。飛他出。樹復來。不遇而去。是日飛歸。檢閣上書亡矣。怒往求樹。樹已不知所之。飛百計尋不得。亦姑置之。樹之出也。挈飛書匿山中讀之。年餘盡究其技。喜曰。師絕技。吾盡得之。雖師至。吾亦不爲怯矣。遂之京津。京津旱道北總薊遼。南通齊魯。多伏莽。樹挾絕技遊其間。要挾婪索。無所不至。有不順者。劍戕之。乃己。羣盜皆惡之。欲害樹。樹躡捷甚。往來如風。倉猝不能近。嘗宿妓家。伏盜自牀下出。砍以刃不中。中妓妓瘞。而樹已破屋騰去。明日盜二人者。飲酒肆中。忽白刃自窗入。斷一人頭。卽前宵牀下人也。他盜聞之。皆咋舌。居京津十數年。思南歸。過濟南。見一婦人。年近四十。携一幼女。甫十三四。操南音。女立廣場中。把劍舞。作種種形式。婦號於衆曰。妾不幸夫死。隻身無所依。不得已走天涯。將以此技爲吾女求雀屏之選。諸君能垂青者。幸當場一試好男兒。身手何如。樹視女美甚。而繞場觀者多人。皆莫敢前。乃橫劍入。往還數合。婦忽呼曰止。君技不凡。奈何不通姓名。耶。樹以告婦曰。

鄭君耶。若爾。此地非角技所。東城後有隙地。明日盍往一較。何如。澍見女技非勁敵。且疑有意。卽應之曰。諾。明日結束而往。女已先在一縱劍。乃非昨比。澍悉技禦之。差得相當。良久氣急。汗如雨。女逼益緊。方著力。忽人叢中一叟呼曰。妙哉。劍乎。叟者金飛也。澍一聞其聲。少錯愕。女劍下。右腕並劍解矣。旋見武士數十。各操刃奔而前。爭呼曰。報仇報仇。澍知不能免。叟前向衆拱揖曰。承諸君命。已折之矣。幸推薄面。恕之可也。澍見叟愧甚。叟更爲傅藥。創愈。竟不死。始知澍去後。金飛納妾生女。羣盜已怨澍久。訪得飛。招以制之。妾若女亦皆具絕技也。澍所盜書。飛復搜以去。澍尋南返。凡飲食起居。皆以左手。無復恣橫矣。

劍術

金陵瀟灑幼敏銳。有英氣。兩眸子閃閃若電。跳踉戲嬉。不肯就塾學。少長讀書。習舉子業。下筆千餘言。不能就律。師譙訶。輒恚曰。我生人。奈何以死法拘我。遂棄去不學。邑有靳某者。孔武有力。善技擊。自謂嘗拳斃一豹。灑聞之。從而學焉。年餘技

有進能跨劣馬。挽十石弧。於是詡詡自喜。以爲一時無兩也。顧性狂傲。每儕輩有會集。輒以氣凌人。使酒罵座。無所不至。以是人咸畏之。號曰繡虎。無何因友人介紹。幕游淮上。一日值主人大譙賓客。灑亦與焉。乘酒放言。詼諧雜至。座中人咸避其鋒。上座一客。狀貌清癯。布衣敝屣。神氣自若。主人甚敬之。客亦意氣落落。視灑若無覩。灑甚不平。意其必不能武事也。思有以難之。乃拉與談劍術。客於劍術精奧。正變甚悉。詞源滾滾。如瀉三峽水。灑不能難。主人舉杯曰。今夜只談風月。如有及學問者。請依平原飲罰。無何酒闌人散。退入書齋。進茗清談。灑見壁懸有古劍。思欲以技壓客。卽掣取作磨旋舞。寒光散如梨花。虹氣射人。且數數逼客。客但微笑。似不覺其意在沛公者。主人顧客曰。君善技者。曷評點之。客微哂曰。固庸俗中之健者。灑怒其輕已。授之劍曰。爾能之乎。盍亦試之。客笑曰。此何足奇。僕有小技。請爲君試之。言已。仍懸劍於壁。探衣出朱囊。盛劍七口。舞於庭中。飛躍揮霍。寒光電激。或橫若掣帛。旋若歛火。有短劍長一尺許。時時及灑巾際。灑不禁色撓氣降。

叩首不已。客長嘯一聲，倏忽不見。亟仰視，則立於庭中最高石筍上。劍飛如流星，圍繞其身。忽向上一躍，亟收其劍，擲地作七星狀。招灝曰：「吾技至此矣。盍來一出手。」灝愧汗交集，不敢作一言。客翩然飛下，挽灝臂曰：「且去去來。」灝遽覺身輕如葉，凝視之，則已與客共立石筍上。筍尖僅容一足趾，身搖搖少動，卽仆。客授劍曰：「爾能之乎？」盍亦試之。灝懼極欲號，主人力爲懇求。客曰：「君真吝教哉。」言已，遽捉其臂，從石上躍下。如鷹隼之搏鷄雛。客顧曰：「向試君膽耳。」又曰：「君材自佳，惜不自琢磨。但戒子之驕氣，又何難至真境。」灝再拜曰：「今日而後，性命皆丈所賜，願供役左右。」客曰：「君骨相尙有暴氣，不可遽授。別日更相顧也。」因請問其術何名。曰：「散花舞也。」灝歸，氣色如病者。臨鏡，巾幘及髮，僅留其半。自是謙抑下人，不敢矜技。灝年八十，鬚髮斑白，精神尤豐饒。輒謂人曰：「馬援傳不可不讀。」

劍削林木

李瀚章撫湖北時，一日爲其太夫人祝壽，來賓甚盛。忽一人登堂，年可四十許，見

李卽長揖曰。君識我乎。李仰憶久之。不能省記。其人曰。君亦記君家後園樹林被削之事乎。李愕然。亟改容加禮。稱爲神仙。請入座。與燕。燕畢。亦遽辭去。賓衆莫測所以。爭前問故。李曰。斯真大異事。余童時與諸弟讀書家塾中。一日散學後。與諸弟戲門前。見一人似從他方來者。方蹲而大便。旁有小包袱。余等戲解視之。中有小紙裹。并欲開視。其人大呼不可。見余諸人。已執紙裹。亟提棍前欲奪回。則紙裹已微開。瞥有氣衝出。其人頓足曰。殆矣。殆矣。卽蜷伏地上。若甚畏悚者。頃之。又見氣回入紙裹中。余等怪問其故。其人悚然曰。汝等真大福人。余故能劍術。紙裹之中。乃劍也。向出必殺人。始返。汝等前程遠大。故無傷。移於君家後園林木矣。語罷。匆匆去。余輩怪其語不經。試入後園一觀。林木則各樹樹杪枝葉。全被削去。余等始大驚異。昨客卽其人也。今距前事三十餘年。而昨省視其貌。實不異前時。非真有道之士耶。一時座客聞之。亦詫歎不已。

